

MAK

Gae Oraiwa Mak Tenewa

Babataito Abnawa Jon Eb Waribiyaivi

- 1** ¹ God Usiwa Iesu Keriso gae oraiwa amatonewa.
² ^a Propeta Aisaya buka meuma danave tene,
“Yawa, ne umum abnawa barautna namugap ompe, me ebun geuma waribiyape.”
³ ^b “At inguiwa arawa danave apan da noiwa auwaivi,
‘Ayapan oya ebun waribiya, ebun siwavit menan waribiya.’”
⁴ ^c Meve Jon uwane, at inguiwa arawa apa babataito amunivi, sira opata me nonemagowa biroriyag babataito atan oya, wag dirumivi.
⁵ At Judia ge Jerusarem igiyawa undag menan amiya. Mu kukaeba muma boruwa aya, sira mu yoi Jordan danave me gumbe babataito aya.
⁶ ^d Jon wape ennewa me mae kameru gumawa gaibu, kwit gumbe powawa topanne, sira me paki ge kemari mundanavewa naivi. ⁷ ^e Mame me gaiyawa, “Sira apan ne amanap uwapewa me yusipama, ne me mina onan. Ne oma den ane kwanasik amawa sandoro vetna. ⁸ Ne yoi gumbe babataito ayenna, go me Guwawa Iyakaisiyapama gumbe babataito ayempe.”

Iesu Babataito Anewa Amaorot Uwa Wanne

- ⁹ Me kumiwa apa Iesu at Nasaret Gariri danave apa onne, sira me Jon gumbe yoi Jordan apa babataito ane. ¹⁰ Sira Iesu yoi gumbe dauwanewa, kwimin watabne Guwawa me umuk mina aig onivi yaune. ¹¹ ^f Sira noiwa kwimin apa uwane, “Ge ne utunwa ne baigan neuma gungap, ge gungap ne degadega eni.”

^a 1:2 Mak 3:1 ^b 1:3 Ais 40:3 ^c 1:4 Apa 13:24; 19:4 ^d 1:6 2Ki 1:8; Mat 11:8
^e 1:7 Apa 13:25 ^f 1:11 Sam 2:7; Ais 42:1; Mat 12:18; Mak 9:7

¹²Tatevit Guwawa me baraune at inguiwa arawa aine. ¹³At inguiwa arawa apa me kum 40 wakeg Seitan amaerot uwag wanne. Mundanavewa maeba me gaibu wakeya, sira aneya me gumbe uwag waniya.

Iesu Aigowawa Meuma Namuirenwa

¹⁴Jon me nog barauya aignewa, meve Iesu Gariri aine God gae meuma oraiwa opata wane. ¹⁵Me wane, “Kum me uwaivi, God toimuwawa me koni aivi. Ye nonemagewa biroriyaya sira gae oraiwa anotumat aya.”

¹⁶Sira Iesu poeman Gariri visive ainewa, me yawamne Saimon ge gwaneba Andru mu poeman danave uwariri aoreme. Kuyiawa mu gwambui upeme igiyawa. ¹⁷Iesu dirumne, “Amanap oneya. Wag toyau yentna, ye iyayapan upeme igiyawa aya.” ¹⁸Tatevit uwariri muma yankweg me amave amiya.

¹⁹Sira me kusi atan aike Jebedi usiwa Jemus ge gwaneba Jon mu wa danave uwariri muma tamibarip eme yawamne. ²⁰Munan tatevit auwanewa, mu mamowa Jebedi ge nau meumawa igiyawa wa danave kwemiya. Mu me amave amiya.

Apan Me Airapu Kukaeba Gaibu

²¹Mu at Kapenaum amiya. Sabat Kumiwa apa Iesu sinagogu unig aine, sira me amatok wak toyau munne. ²²Iyayapan toyau munnewa anog teraya. Kuyiawa apan da bira yusiwa aunewa mina toyau munne, me Gwangwan toewanewan igiyawa mina onan. ²³Sira sinagogu me danave apan da wakene. Me danave airapu kukaeba wakeya. Me kwaruwag wane. ²⁴“Nasaret apan Iesu, ge nugunup divi amon? Nu watkukam nuntan onagana? Ne yaug anona ge bira. Ge God Apan Iyakaisi meuma.”

²⁵Iesu gae yusipamit wane, “Gae yankweya! Me gumbe yankweg dauwaya!” ²⁶Airapu kukaeba mu apan yusipamit ipuniyane, me gumbe awauepam dauwag amiya.

²⁷Iyayapan undag yaveg anoya, mu garawag anoya, “Mame divi? Mame toewanewan yusipama mataiwa? Me yusipamit airapu kukaeba dirumnewa, mu noiwa auya.” ²⁸Me umum meuma tatevit at Gariri apa undag wateteyamne.

Iesu Iyayapan Obiren Warinamunne

²⁹Koni mu sinagogu yankweg dauwag amiyawa, me Jemus ge Jon gaibu Saimon ge Andru gwe muma amiya. ³⁰Saimon nimnagawa vesinawa yuwat amipam aug gweyau deriyat egave wakene. Iyayapan

^g 1:13 Sam 91:11-13 ^h 1:14 Mak 6:17 ⁱ 1:15 Mat 3:2 ^j 1:22 Mat 7:28-29

^k 1:24 Mak 5:7 ^l 1:26 Mak 9:26 ^m 1:28 Mat 4:24

mu Iesu gumbe umum waya. ³¹ Me menan aine, me nanive aug enagadne yoine. Yuwat amipam onanane, me amatog munan amat munivi.

³² Kum aigne augoiyau, iyayapan yuwat igiyawa ge airapu kukaeba doramnewa tam Iesu gumbe uwaya. ³³ At toimu igiyawa undag ankwin noive agoniyag wakeya. ³⁴ Iesu iyayapan obiren yuwat gina ubeube warinamunne. Me airapu kukaeba imne amiya. Me den baina wane airapu kukaeba divi da wape, kuiyawa mu anoya me bira.

Gariri Apa Iesu Oyata Wane

³⁵ Mumbevit aram muniwa apa, Iesu wan yoine, gwe kwene sira pontone arawa aike nun waivi. ³⁶ Saimon ge me owowawiwa meuma menan yob onamiya. ³⁷ Mu me yauyawa mu boboepaniyawa me diya, "Iyayapan undag genan yob eme!"

³⁸ Iesu garawa wane, "Marewan gwe manmanwa ampa ampa anta. Asimeve gaibu ne oma ane opata wak dirumpna, kuiyawa me oya onedna." ³⁹ Me at Gariri undag amdau birorot aine. Me sinagogu muma danave opata wak dirumne, sira airapu kukaeba imne amiya.

Iesu Apan Warinamne

⁴⁰ Apan me yuwat warumne iviwa reprosi aunewa uwane. Me koniwa yug nun wane, "Nenan ano negawa, ge waribiya nega oraimina atna."

⁴¹ Iesu danadawai aune, me naniwa ereriyane apan gumbe yum dig wane, "Ne imunap, oraimina a!" ⁴² Tatevit yuwat warumne iviwa reprosi yankwene, sira me oraimina ane.

⁴³ Iesu gwangwan yusipamit gaibu tatevit me baraune aine, ⁴⁴ me apa didne, "Yaukapa. Iyayapan da den diruma. Megara gembovit ag piriisi gumbe toyauwana. Sira Mosisi gwangwan wanewa mina gembo muintan oya puyo barauwa wana me gumbe iyayapan yaug anope ge oraimina ana." ⁴⁵ Megara aike amatog me iyayapan umum dirum wane. Gae mame wateteyamne. Meoya, Iesu at kokawa oma den ane taibe aine, me iyayapan onanwa arawa apa daieve aig wakene. Megara iyayapan mu ampa ampa omeg me gumbe uwaya.

Iesu Apan Da Amananiwa Buburuimusiawa Warinamne

2 ¹ Kum oiyat dawa apa, Iesu Kapenaum unigne, iyayapan anoya me gweyau onne. ² Iyayapan obiren uwag agoniyaya. Gwe danawa at da den wakene ankwin noiwa gaibu noidauwane. Me gae wag dirumne. ³ Apan duwam ge duwam mu apan amananiwa buburuimusiawa yotug me gumbe onamiya. ⁴ Me kumive mu oma den ane me aug Iesu gumbe barauya,

ⁿ 1:34 Mak 3:10-12 ^o 1:35 Mat 14:23; Mak 6:46 ^p 1:39 Mat 4:23; 9:35

^q 1:44 Rvt 14:1-32

kuiyawa iyayapan noidauwane. Mu Iesu egave gwanob yayag apan amananiwa buburuimusiawa parauvinne gomaepam murap kwigieneya aigne. ⁵Iesu anotumat muma yawamne, meve apan me amananiwa buburuimusiawa gumbe wane, “Utunwa, kukaeba geuma anog yankwene.”

⁶Megara Gwangwan toewanewan igiyawa upeba mu asime wakeya, mu danowo wag dirumiya, ⁷“Apan mame divi oya gae mamaib wane? Me God gumbe watkukamivi. Bira me oma ane kukaeba anog yankwetan, God mekut ape?”

⁸Iesu tatevit me guwawa meuma gumbe mame anone divi mu danowo anoemewa, sira me wak dirumne, “Divi oya ye mame anoene? ⁹Ambuwa me taibe; ne watna, apan amananiwa buburuimusiawa gumbe, ‘Ge kukaeba geuma anog yankwena,’ da watna, ‘Wan yoiya goma geuma aug aga.’ ¹⁰Megara, ne imunap ye yang anoya. Apan Usiwa’ me piyu egave yusiwa gaibu, me oma ane kukaeba anog yankwepe.” Meve me amananiwa buburuimusiawa abnawa dig wane, “Ne ge dirukna, wan yoiya, goma geuma aug gwe aga.” ¹¹“Ne ge dirukna, wan yoiya, goma geuma aug gwe aga.” ¹²Me wan yoike, goma meuma aug mu undag namuwo dauwag aine. Mu undag mame gumbe teraya, sira mu God waragasiya waya, “Nu meis da den yavetewa!”

Iesu Rivai Menan Auwane

¹³Iesu sira awau visive aine. Iyayapan obiren me gumbe onamiya, me amatog wag toyau munne. ¹⁴Me aiviwa, me Rivai me Arupies usiwa takesi tamivi abnawa gweyawa kusi apa wakene yaune. “Amanap onaga,” Iesu me dine, Rivai wan yoik amave aine.

¹⁵Iesu me Rivai gweyave augoi nakwaeba naiviwa, yauya, takesi tameme igiyawa ge kukaeba igiyawa obiren uwag Iesu ge me aigowawa gaibu nakwai neme. Kuiyawa iyayapan obiren mu mina Iesu amave amome. ¹⁶“Gwangwan toewanewan igiyawa mu Parisi igiyawa, me iyayapan kukaeba ge takesi tamemewa gaibu neme yawamiya. Mu singui aigowawa gumbo waya, “Divi oya me takesi tamemewa ge iyayapan kukaeba gaibu wakeg neme?”

¹⁷Iesu mame anone mu dirumne, “Ui oraimumu igiyawa mu doketa oya den anoeme, megara yuwat igiyawa mu doketa oya anoeme. Ne iyayapan oraiwa auwatan oya den uwana, go iyayapan kukaeba oya munan uwana.”

Iesu Gumbe Kwit Oya Singui Aya

¹⁸Gare Jon aigowawa ge Parisi igiyawa kwit eme. Iyayapan upeba uwag Iesu gumbe singui aya, “Jon aigowawa ge Parisi igiyawa aigowawa mu kwit eme, megara geumawa mu onan. Me aninin?”

^r 2:10 Me Iesu Keriso. ^s 2:16 Mat 11:19

¹⁹“Memgebip abnawa me amdau igiyawa meuma gaibu wakeyawa, oma ane kwit ape? Mu me gaibu wakeyawa oma den ane kwit ape. ²⁰Megara kum uwape me memgebip abnawa gumbo aug aipe. Me kumiwa apa mu kwit ape.

²¹“Bira da wape musuwa mataiwa waremig wape namuwa gumbé den agenpe, me meib apewa, matai wape musuwa mataiwa me wape namuwa viviyotpe sira me koka ape. ²²Sira bira da wain mataiwa mae kwapiwa irut namuwa danave den egampe. Me meib apewa, wain me mae kwapiwa irutawa dumetpe, sira wain ge kwapiwa irut duwam onanape. Meoya me wain mataiwa kwapiwa irutawa mataiwa danave egampe.”

Sabat Kumiwa Ayapaneba

²³Sabat Kumiwa da, Iesu me nau danave aivi. Me aigowawa amome. Mu amatog nakwai wiit^f upeba tameme neme. ²⁴“Parisi igiyawa wag diya, “Yawa, divi oya mu Sabat Kumiwa apa Gwangwan togomeme?”

²⁵“Me garawa wane, “Ye Devid ge owawa iyagon wakeyawa kumiwa me aninin ane? Ye basiyayana go onan? ²⁶“Me Abiataru me pirisi kokawa kumiwa apa, Devid me God gweyawa unigne bredi me waribiyane nane. Me Gwangwaneba me pirisi igiyawa mukut nape. Sira me upeba aigowawa munne naya.”

²⁷“Meve me wag dirumne, “Sabat Kumiwa me apan oya, sira apan me Sabat Kumiwa oya onan. ²⁸Meoya Apan Usiwa me Sabat Kumiwa Ayapaneba.”

Iesu Apan Naniwa Gegerainewa Wasiwamne

3 ¹Iesu sinagogu danave unig aine. Apan naniwa gegerainewa asime apa wakene. ²Iyayapan upeba mu Iesu pui yutan oya yaveg anoeme gae ambuwa ditom. Me Sabat Kumiwa apa warinampe go onan, yautan oya mu yangowa me gumbé wakene. ³Iesu me apan naniwa gegerainewa gumbé aib wane, “Iyayapan namuwo wan yoiya.”

⁴“Meve Iesu wag dirumne, “Sabat Kumiwa Gwangwan gumbé ambuwa oraiwa: Oraiwa atanwa go kukaeba atanwa, inaiinai waita wantan go toinguttan?” Megara mu nouwa iyadmusia.

⁵Me birorot danapiripam yangut yawamne, anogugud ane mu nonowa yaigipam. Sira apan me digwane, “Nanigwa atan dima.” Me naniwa siwadne oraimina di ane. ⁶“Meve Parisi igiyawa dauwag amiya, sira Erod igiyawa gaibu mu aninin akape Iesu totan oya, mu iyapeba paneme.

Iyayapan Obiren Iesu Amave Amiya

⁷Iesu me aigowawa gaibu awau amiya. Iyayapan obiren mu Gariri apa onamiyawa amowo amiya. ⁸Mu me aiviwa undag anoyawa, Judia,

^f 2:23 Bredi me nakwai wiit gumbé wareme. ^u 2:24 Deu 23:25 ^v 2:25 1Sm 21:1-6

^w 2:26 Rvt 24:5-9 ^x 2:27 Deu 5:14 ^y 3:4 Ruk 14:3 ^z 3:6 Mat 22:15-16

Jerusarem, Idumia ge at kokawa birorot me Jodan gampenwa, ge Taiya ge Saidon birorot apa iyayapan obiren me gumbe uwaya.

⁹Me aigowawa dirumne, “Iyayapan obiren oya ne iyayapan asinut siririyatna. Wa kusikarenwa aug negiya.” ¹⁰“Me iyayapan obiren warinam munne, meoya yuwat igiyawa me yumtan oya garaman ag me gumbe uwaya. ¹¹^bAirapu kukakaeba me yavemewa, mu me namive uyug aigek kwaruwaya, “Ge God Usiwa.” ¹²^cMegara Iesu yaigipam dirumne, umum den wape ne bira.

Iesu Apasoro^d 12 Tamne

¹³Iesu tui dog aine. Iyayapan me anoiviwa munan auwane. Mu menan onamiya.

¹⁴Me aigowawa 12 tamne. Mu me gaibu, sira opata waigimtan tepe ampe, ¹⁵sira mu yusiwa auk airapu kukaeba atatai impe. ¹⁶^eIyayapan mame mu aigowawa 12 om yuwamnewa: Me Saimon ug Pita yune; ¹⁷^fsira Jebedi usitainawa Jemus ge gwaneba Jon gumbo me ivuwa Boanaji munne, me natawa aegnaminin ge kapisi usitainawa. ¹⁸Andru, Pirip, Batoromiu, Matiu, Tomas, Jemus me Arupies usiwa, Tadaiyas, Saimon me Jerot abnawa.^g

¹⁹Isukariot Judas, me Iesu ominawa baraunewa.

Iesu Ge Berujeburu^h

²⁰Meve Iesu gwe unigne. Sira iyayapan obiren agoniyaya, meoya me ge aigowawa mu nakwai natanwa kum onan. ²¹Iesu inawa tatawaiwa ge yogeyawaiwa mame anoyawa, mu autan onamiya. Kuyawa mu waya, “Me kuiya kukaine.”

²²ⁱSira Gwangwan toewanewan igiyawa mu Jerusarem apa onamiyawa waya, “Berujeburu me wait aune! Airapu kukaeba kokawa usiwa gumbe me airapu kukaeba atatai imivi.”

²³Meoya Iesu munan auwane onamiya, meve me gae maibe gumbe mu dirumne: “Seitan me aninin Seitan atatai itan? ²⁴Toimu togomiyak ge yoik apewa, gwetoimu me oma den ane yoipe. ²⁵Sira gwe togomiyak ge yoik apewa, gwe me oma den ane yoipe. ²⁶Sira Seitan me danave mut ape togomiyak yoik apewa, me den yoipe onanape. ²⁷Natawa di, bira da me apan yusipam gweyawa unig dividivi meuma tamtan anopewa, namu apan yusipama den tupewa, oma den ane gwe dana unig dividivi tampe. Meoya namu tukapa, meve dividivi bope. ²⁸Ne natawa diruitna, apan kukaeba apewa go God gumbe ano kukam wapewa mu anog yankwepe.

^a 3:10 Mat 14:36 ^b 3:11 Ruk 4:41 ^c 3:12 Mak 1:34 ^d 3:13 Apasoro me ewamuniviwa da ube. ^e 3:16 Jon 1:42 ^f 3:17 Ruk 9:54 ^g 3:18 Jerot me dam iviwa. ^h 3:20 Berujeburu me airapu kukaeba iviwa. ⁱ 3:22 Mat 9:34; 10:25

²⁹Megara bira da Guwawa Iyakaisiyapama gumbe ano kukam wapewa, me den anog yan kwepe. Me yaibobot kukaeba meuma ane onan den ape.”

³⁰Me mame wane. Kuyawa mu veme, “Iesu me airapu kukaeba aune.”

Iesu Inawa Ge Tatawaiwa

³¹Iesu inawa ge gwanebaiwa uwaya. Mu daieve yokeg ud da barauya unig menan auwane. ³²Iyayapan obiren mu birorot me gumbe yan wakeya mu wak diya, “Inag ge gwanegaiwa gwe daieve wakeg genan yobeme.”

³³Me singui wane, “Ne inan ge tatanaiwa mu bira?”

³⁴Me iyayapan mu ikukuk paneg wakeyawa birorot yawamne, dirumne, “Ne inan ge tatanaiwa mawa wakeya! ³⁵Da bira me God anowawa aiviwa me tatangwanen ge yogiyaniwa ge inan.”

Yawa Emeiviwa Abnawa Maibeyawa

4 ¹Sira Iesu amatok awau visive toyaumunne. Iyayapan obiren me gumbe uwaya. Meoya me awau egave wa danawa unig yan wakene. Iyayapan obiren mu awau visive wakeya. ²Iesu dividivi undag gae maibe gumbe toyau munne. Me toyaumunnewa danave aib wane, ³“Anoya! Nau abnawa me yawa tam vettan aine. ⁴Me yawa emeiviwa, upeba ebun taibe aigiya. Nenip uwag naboriya. ⁵Upeba an egave aigiya, asime piyu koka onan. Mu tatevit dumiya, kuyawa piyu kusi da egave. ⁶Megara kum dauwag mu igamne undag toyaimusia, kuyawa mu taiwa epampa den aigiya. ⁷Yawa upeba gan danave aigiya. Yawa yaig yoiya, go gan warumne, meoya natawa den inne. ⁸Sira upeba piyu oraiwa gumbe aigiya. Me yaig yoiya koka aya natawa iniya. Me 30, 60, 100 mina natawa inamiya.”

⁹Meve Iesu wane, “Da bira anotan oya naunawa gaibu ipewa me anope.”

¹⁰Iesu mekut wakenewa, aigowawa 12 ge upeba da mu me gumbe birorot wakeyawa, mu gae maibe meuma oya singui waya. ¹¹Iesu mu dirum wane, “God toimuwawa anoano guwavewa me wait toyau yenna. Megara asipa painauwa igiyawa mu gumbo dividivi undag gae maibe gumbe dirum veni. ¹²^m“Mu yaveme megara den auveme, sira anoveme megara den yaug anoeme; mu kukaeba muma anak den yankwepe!” me meib.

¹³Meve Iesu mu dirumne, “Ye gae maibe mame den anoene? Aninin akape ye gae maibe da anoene?”

^j 3:31 Mak 6:3; Jon 2:12; Apa 1:14 ^k 4:1 Mak 3:7-9; Ruk 5:1-3 ^l 4:2 Mat 13:34; Mak 4:33-34 ^m 4:12 Ais 6:9-10; Apa 28:26-27

¹⁴Nauwaruat abnawa me gae emeivi. ¹⁵Iyayapan upeba mu yawa ebu taiba mina. Mu gae anopewa, tatevit Seitan uwak gae mu danowo emenewa tam aipe. ¹⁶Iyayapan upeba mu yawa mu an egave mina. Mu gae anopewa tatevit degadega gumbe aupe. ¹⁷Megara taiwa onan, meoya kum koni pipi aigimpe. Gae gumbe ibnawa go edawai uwapewa, mu tatevit a ampe. ¹⁸Iyayapan upeba da mu yawa gan danave mina. Mu gae anope, ¹⁹ⁿmegara piyu mame anoano meuma anopewa, tawara ugai mumpewa, dividivi undag da atanwa anoemewa mu unig gae tobotpe, meoya natawa den impe. ²⁰Iyayapan upeba mu yawa piyu oraiwa gumbe mina. Mu gae anope, aupe, sira mu 30, 60, 100 mina natawa inampe.”

Damempa Maibeyawa

²¹^oMe wak dirumne, “Ye dun kabum go deriyat ankwatave barautan oya aug oniyana? Garawa ye me dun yokeiviwa egave barauya.

²²^pDividivi undag me guwawe wakenewa me taibe ape, sira dividivi undag guwavewa me watappe. ²³Da bira anotan oya naunawa gaibu ipewa me anope.”

²⁴^qSira me meis wane, “Anoenewa yaimoyai anoya. Ye om yuyawa, ebu desirom mina me matai om yuepe,—sira egave yempe. ²⁵^rDa bira aunewa me sira kokavit aupe. Megara, da bira den aunewa, divi aunewa me gumbe atan aupe.”

Yawa Yaiviwa Maibeyawa

²⁶Me sira wane, “God toimuwawa me mame mina. Apan yawa piyuwau emene. ²⁷Aram ge kum, apan me kubvinivi wan yoiviwa, yawa toen dumivi yaivi, go me aninin yaivi den yaug anone. ²⁸Piyu me mekut natawa inivi—namu powawa, meve begawa, meve begawa danave natawa inivi. ²⁹^sMe natawa kweraipewa, tatevit deba gumbe gomiyape, kuiyawa maura kumiwa uwane.”

Gayum Yawa Maibeyawa

³⁰Sira me wane, “God toimuwawa me divi mina anin waton, sira divi gae maibe nu anin waton? ³¹Me gayum yawa mina, me yawa kudnausiren me ge piyuwau emegewa. ³²Megara me emenewa, me yaig yoipe, nau danave dividivi undag wakeyawa danowo me kokavit ape, sira me naniwa koka yupe, nenip painauwa uwag gugupave wakeigimpe.”

³³Iesu me gae wak dirumne gae maibe obiren gina desiroma gumbe. Mu undag yaug anoya mina ane. ³⁴Me maibe den kwene dividivi undag maibe gumbe dirumne. Megara me aigowawa mukut, gumbo natawa taibe wane.

ⁿ 4:19 Mat 19:23-24 ^o 4:21 Mat 5:15; Ruk 11:33 ^p 4:22 Mat 10:26; Ruk 12:2

^q 4:24 Mat 7:2 ^r 4:25 Mat 13:12; 25:29; Ruk 19:26 ^s 4:29 Joe 3:13; Rev 14:15

Iesu Wane Taig Kokawa Memeyaine

³⁵Oiyat me augoiyau uwanewa, me aigowawa dirum wane, “Nu anta asiwa visi gampenwa.” ³⁶Iyayapan mu kwemiya. Me wa danave, mu me mina gaibu amome. Asimeve me mina wa upeba gaibu amome. ³⁷Meve taig okup uwag yawarat wa umne. Yoi wa noidauwane. ³⁸Iesu wa namive unan yug kubvinivi. Aigowawa me togwanamiya, wag diya, “Ewanewan, ge nu den amat anuna nonunwa napewa?”

³⁹Me wan yoine, taig dig wane sira yawarat gumbe dine, “Iyagisia! Ipunapun onan!” Meve taig aig botone, sira awau botone.

⁴⁰Me wag dirumne, “Divi oya ye a ene? Ye ande anotumat onan?”

⁴¹Mu a akape gara wa aya, “Mame me bira? Taig ge yawarat me noiwa auya!”

Apan Me Airapu Kukaeba Gumbewa Iesu Warinamne

5 ¹Mu at Gerasa me poeman gampenwa dauwag amiya. ²Iesu wa kweg dauwag onnewa, apan me airapu kukaeba gumbewa me nuntosatan oya babat apa uwane. ³Apan mame babat apa vinivi. Bira da oma den ane tupe, ayan murapeba sein gumbe tuya go oma den ane. ⁴Kuiyawa me kapet go ayan murapeba sein gumbe naniwa ge amawa evedni tueme, megara me ayan murapeba sein gomiyane sira kapet me amawa tuiyawa gomiyane. Bira da yusipama onan me aug baraupe aikpe. ⁵Meoya kum ge aram yampot apa ge tui gumbe me it awau epam membovit an gumbe ingan toivi.

⁶Me Iesu asipa painau yaunewa, me kintog namive aig konive yune. ⁷Me kwat kuiyaven wane, “Ge nu gunup divi amon, Iesu, God Painauvitwa Usiwa? God namive agi wa. Ge dawai den nega!” ⁸Kuiyawa Iesu me gumbe wane, “Ge airapu kukaeba, apan mame gumbe dauwa!”

⁹Iesu me gumbe singui wane, “Ge ivugwa anin?” Garawa wane, “Ne ivunwa me Rijon, kuiyawa nu aboit.” ¹⁰Sira me Iesu gumbe nun wa ge wa ane, at mame apa den tepe ampe.

¹¹Bui obiren koni tui gampenwa apa mo muneme. ¹²Me airapu Iesu gumbe nun wane, “Tenuna anta bui danowo, bainya wa, anta bui danowo unikta.” ¹³Me gumbo bainya wane, sira meve airapu kukaeba uwag dauwaya bui danowo amiya. Bui undag 2,000 mina, erai wareg aigeg awau apa nonowa naya boriruwaya.

¹⁴Iyayapan mu bui amaremewa kintog amog at kokawa ge at gwetoimu apa mame dirumiyawa, iyayapan dauwag divi aninin anewa yautan onamiya. ¹⁵Mu Iesu gumbe onamiyawa, mu yauya apan me danave airapu kukaeba obiren dadi^u wakeyawa. Me wape enne, kuiyawa

^t 5:7 Mak 1:24 ^u 5:15 Baiboru danave tenewa me Rijon. Natawa me mut igiyawa kuiya da. Me danave mut igiyawa 6,000 mina wakeya.

oraiminavit gumbe yan wakene. Mu a aya. ¹⁶Mu me yauyawa iyayapan gumbo dirumiya apan me airapu kukaeba pannewa gumbe anin ane, sira dirumiya bui gumbo anin anewa gaibu. ¹⁷Meve iyayapan amatog Iesu dig waya at muma kweg aipe.

¹⁸Iesu amatog wa avig aiviwa, apan me airapu kukaeba pannewa uwag wane ne gaibu anta. ¹⁹Iesu me bairawan den wane, sira wane, “Vesin ud munan taig aga, diruma Ayapan anintom ge gungap ane sira ano gennewa.” ²⁰Meoya apan me at Dekapolis gumbe aike amatog dirumne Iesu anintom menan ane. Meve iyayapan undag anog teraya.

Otau Boanewa Ge Vesin Yuwaranewa

²¹Iesu sira wa gumbe awau gambenwa ainewa, iyayapan obiren Iesu gumbe agoniyaya. Me awau visive wakenewa, ²²sinagogu^v amaraivi abnawa da, iviwa Jairos, asime uwane. Iesu yaunewa me amave aigne, ²³Iesu gumbe nun wa ge wane, “Ne gwaitanwa kudnausiren me boavi. Garawapa onakpa ge nanigwa gumbe baraupa, me aninapa inaig wakepa.” ²⁴Meoya Iesu me gaibu amiyawa, iyayapan obiren amave amog birorot empaniya. ²⁵Vesin da me bairawan 12 danave ganigani wariviwa asimeve wakene. ²⁶Doketa obiren yauya megara den warinamiya danadawai kokavit me aune. Sira dividivi meuma undag gumbe wakenewa mumbodne, go inai den aune yuwat koka ande wakene. ²⁷Me Iesu oya veme anonewa, me on iyayapan yapowo yoig daieven wapeyawa yumne. ²⁸Kuiyawa me anone, “Wapeyawa yumpna ipewa, ne inaigitna.” ²⁹Tatevit me ganigani wariviwa gomane. Me uwiwa danave demtawa aune dawai onanane.

³⁰^wIesu tatevit anone me yusiwa me gumbe dauwag aine. Me iyayapan yapowo birorot yavivi dirumne, “Bira ne wape yumne?”

³¹Aigowawa meuma garawa waya, “Ge yavege iyayapan agoniyag ge manageme, ge singui divi oya vegan, ‘Bira ne yumnedne?’ ”

³²Iesu me bira ane yawatan oya di birorot yavivi. ³³Meve vesin me aninin me gumbe matadne yaug anone. Daramipam uwake Iesu amave aigne natawa undag dirum wane. ³⁴^xIesu dig wane, “Gwaitanwa! Anotumat geuma warinam genne. Yum gumbe aga, dawai geuma auegewa onanane.”

³⁵Iesu gae ande waiviwa, iyayapan upeba Jairos me sinagogu amaraivi abnawa gweyawa apa uwag waya, “Ge gwaitagwa me boane. Divi oya toewanewan gumbe wayug wayug ege?”

³⁶Iesu gae muma veme anonewa, sinagogu amaraivi abnawa gumbe wane, “A den a. Di anotumat a.”

³⁷Me den bairawan wane bira da gaibu amave aipe. Pita, Jemus ge Jon me Jemus gwaneba mu mukut. ³⁸Mu sinagogu amaraivi abnawa

^v 5:22 Me Ju nun gweyawa mina. ^w 5:30 Ruk 6:19 ^x 5:34 Mak 10:52; Ruk 7:50; 17:19

gweyawa meuma uwayawa, Iesu yawamne mu danadawai gumbe iruveme sira it aen gaibu veme. ³⁹Me aig unig dirumne, “Divi oya ye wayug wayug ge it aen venan? Ud den boane, me di kubvinivi.” ⁴⁰Mu Iesu gumbe towaya. Namu Iesu iyayapan undag bog tene dauwag amiya, ivi ud mamawa inawa ge me aigowawa mu me gaibu tam ud ampa wakenewa me unig aine. ⁴¹Me ud nanive aug dig wane, “Tarisa kum!” (Me natawa, “Otau, genan veni, wan yoiya!”) ⁴²Tatevit otau wan yoig birorot aine. (Me bairawan 12 onanane.) Mu mame gumbe tet kokavit aya. ⁴³Iesu gwangwan kokavit munne bira da mame den wape anope. Me dirumne nakwai da otau wampe nape.

Propeta Ebnotu Onanwa

6 ¹Iesu asime kwemne, gwetoimu meuma aine. Aigowawa amave amiya. ²Sabat Kumiwa uwanewa, me sinagogu danave amatog toyau munne. Iyayapan obiren me anoyawa anog teraya. Mu singui aya, “Apan mame divi mame aiviwa ampa tamne? Sira me anoano oraiwa mame wannewa ge irayauyau aiviwa me divi gumbe aune? ³Apan mame me gwe sisi abnawa, onan? Mame me Meri usiwa ge Jemus, Josep, Judas ge Saimon tatawa, onan? Me yogiyawawiwa mapa nu gaibu wakeya, onan?” Mu Iesu gumbe anotumat den aya.

⁴Iesu wag dirumne, “Propeta me gwetoimu meuma, iyayapan meuma, gwe meuma danowo mekut ebnotu gumbe da onan.” ⁵Me asimeve irayauyau den ane. Me anewa me naniwa yuwat igiyawa upeba kuiyovo tene inaimusia. ⁶Sira Iesu anotumat muma onan oya terane. Meve Iesu gwe gwe gumbo birorot aine toyau mumne.

Iesu Apasoro 12 Tene Amiya

⁷Apasoro 12 munan auwane gumbe uwaya. Mu duwam duwam tene amiya. Airapu kukaeba atatai imtan oya yusiwa munne. ⁸^bMame gwangwan meuma: “Amdau oya divi da den auya. Tutu mekut auya, bredi onan, ikwai onan, powawa berip danave anmaga onan. ⁹Sandoro mekut tuya, go gweb ankwatawewa duwam den eniya. ¹⁰Evedni evedni gwe ambuwa unigimiyawa, asime wakeigimiya, meve at gwe me kweya. ¹¹^cYe at ambuwa uwaya den baigan yempewa go gae yeuma den anopewa, mu yaug anotan oya amedanawa atapupu toya aikpe, meve at me kweya.”

¹²Mu amiya, sira iyayapan nonemagowa biroroyatan oya opata muniya. ¹³^dMu airapu kukaeba obiren atatai imiya, sira yuwat igiyawa obiren egowo oira egamiya, mu inaimusia.

^y 5:41 Ruk 7:14 ^z 6:2 Jon 7:15 ^a 6:4 Jon 4:44 ^b 6:8-11 Ruk 10:4-11 ^c 6:11 Apa 13:51
^d 6:13 Jms 5:14

Babataito Abnawa Jon Me Meyawa Kwagomiyaya Botone

¹⁴ ^e Jesu iviwa koka anewa, Kin Erod me anone. Iyayapan upeba waya, “Babataito abnawa Jon boriruwayawa igiyawa gumbo sira inaig yoine, meoya inainai ubeube yusiwa me gumbe nau aivi.”

¹⁵ Upeba waya, “Me Eraija.” Sira upeba waya, “Me propeta da watawitwa mina.”

¹⁶ Megara Erod me anonewa wane, “Jon me ne meyawa kwagomiyana boriruwayawa gumbo sira inaig yoine!”

¹⁷ Kuyawa Erod membo dirumne Jon aupe, yumeg tuya, aueg nog barauya. Mame me anewa Erod tatawa Pirip biviwa Erodias me aunewa oya. ¹⁸ ^f Kuyawa Jon me Erod gumbe wane, “Ge tatag biviwa auwanawa me gwangwan gumbe oraimina onan.”

¹⁹ Meoya Erodias me Jon gumbe anog danapiriwane, me imive me tope boitan anone. Megara me mina den ane, ²⁰ kuyawa Erod me Jon gumbe a ane sira me papara vinne. Kuyawa me anone Jon me apan iyakaisiyapama ge danawa esine abnawa. Erod me Jon opata waivi anonewa, anopipanum ane, megara me degadega gumbe anoivi.

²¹ Meve ivi kum oraiwa uwane. Erod yainewa kumiwa apa me koukawa meumawa, mut igiyawa amaramunemewa, Gariri koukawa mumawa igiyawa munan buyunai tamne. ²² Erodias gwaitawa uwag unig tare wadne. Erod ge amdau igiyawa mu degadega aya. Kin me otau gumbe wane, “Divi da anoegewa ne gunap wa. Me ne gentna.” ²³ Sira me gae gwangwan gumbe agi wane, “Ge divi da autan anoegewa ne gentna. Ge imugap at neuma kokawa gampenwa autan anoegewa me ne gentna.”

²⁴ Otau mame dauwag aig inawa dine, “Ne divi oya nun waten?” Me garawa wane, “Babataito Abnawa Jon kuyawa wa.”

²⁵ Meoya otau me tatevit kinipam aig kin gumbe uwag nun wane, “Ne imunap Babataito Abnawa Jon kuyawa. Gare mame di en egave baraug nega.”

²⁶ Kin danadawai kokavit anone. Megara agi meuma yaigipamit wane oya, sira iyayapan buyunai gumbewa yaveme oya, otau wanewa me topai den ane. ²⁷ Kin me tatevit Jon kuyawa aug ontan oya gae yusipam wane. Toinguttanwa abnawa baraune aine. Me nog danave unig aike Jon meyawa togomiyane, ²⁸ sira kuyawa en egave baraug aug taig onne. Me otau me wanne. Otau me inawa me wanne. ²⁹ Jon aigowawa mame anoyawa uwag me kwapiwa aug yampot danave barauya.

^e 6:14 Mat 16:14; Mak 8:28; Ruk 9:19-20 ^f 6:18 Rvt 18:16

Iesu Iyayapan 5,000 Nakwai Utamne

³⁰Apasoro mu Iesu birorot empaniya. Mu dividivi ayawa ge toyau munnewa undag Iesu gumbewa waya. ³¹Me dirum wane, “At wayug wayug onan arawa ne gunap ye yekut oneya nonewa emiya.” Kuyawa iyayapan obiren uwa ge am emewa, mu nakwai muma natanwa kumiwa onan.

³²Meoya mu mukut wa gumbewa pontone arawa amiya. ³³Mu kwemum amiyawa iyayapan obiren mu yang anoya. Meoya mu gwetoimu undag apa amowo kinipam amog asimeve namuwon uwaya. ³⁴Iesu wa avig on aigne iyayapan obiren yawamne. Me munan danadawai anone. Kuyawa mu sip mina mu sip amaraivi abnawa gaibu onan. Meoya me amatog toyautoyau obiren ane.

³⁵Kum aigivi augoiyau uwaiviwa, aigowawa Iesu gumbewa waya. Mu waya, “Mame gina inguiwa arawa, sira kum onanatan aivi. ³⁶Iyayapan kwema ampe, kuyawa mu oma ane at ama gambenwa go gweyowa ampe. Nakwai divi da mumbo gwiruwat nape.”

³⁷Megara me garawa wane, “Ye nakwai da muniya.” Me gumbewa waya, “Me 200 denariⁱ aupe! Nu anta brede me 200 denari gumbewa gwiruwak mu munta?”

³⁸Iesu singui wag dirumne, “Ye brede anintom tamiyan? Aiseg yayua.” Mu yawamiyawa aib waya, “Naningambenit ge gwambui duwam.”

³⁹Meve Iesu mu dirum wane, “Ye iyayapan dirumiya kuiya dada wayo egave yan wakepe.” ⁴⁰Sira mu kuiya dada 100 go 50 yan wakeya. ⁴¹Iesu brede 5 ge gwambui duwam bog kwimin wan yaune, me gaun gumbewa wane, brede warensine. Meve me iyayapan namuwo mu tetan oya aigowawa munne. Me gwambui duwam gaibu mu undag kebag munne. ⁴²Mu undag naya oma ane. ⁴³Aigowawa brede ge gwambui naya musimusiwa pot 12 enamiya noidauwaya. ⁴⁴Apan mu nayawa me 5,000.

Iesu Poeman Egave Aivi

⁴⁵Iesu tatevit aigowawa dirumne wa danave unigiya sira at Betuseida namiven amome, Iesu me iyayapan tene taig amiya. ⁴⁶Iesu iyayapan obiren yankwem, tui visi gambenwa nun watan oya dog aine.

⁴⁷Augoiyau uwane. Wa awau dana bunangave yokene, Iesu mekut piyuwau wakene. ⁴⁸Me aigowawa yawamnewa mu bara wareg itan utan eme. Kuyawa taig gurivi. Arampuna kum koniwa duwamdesi wanteteyau me dauwag poeman egave amave munan aine. Me koni mu emariya muntan ane. ⁴⁹Mu Iesu poeman egave amave onivi yayuyawa, mu yang anoyawa me airapu. Mu kwaru waya. ⁵⁰Kuyawa mu undag me yayua a

⁸ 6:30 Ruk 10:17 ^h 6:34 Nam 27:17; Mat 9:36 ⁱ 6:35-44 Mak 8:1-9 ^j 6:37 Apan da oiyat desirom nau apewa me garawa 1 denari aupe. ^k 6:46 Ruk 5:16 ^l 6:49 Ruk 24:37

aya. Tatevit Iesu munan dirum wane, “Yusiyusi aya! Ma ne. A den aya.”
⁵¹ Meve me wa danave mu gaibu dauwag ainewa, taig memeyaig aigne. Mu teraya guwowa puk wane. ⁵² Kuiyawa mu brede gumbe den yai yaug anoya. Mu nonomagowa yaigiwane.

⁵³ Awau gampenwa dauwag amiya piyu Genesaret apa uwaya, sira anika aoreya. ⁵⁴ Mu wa gumbe dauwag onamiyawa, iyayapan tatevit Iesu irawa yawag anoya. ⁵⁵ Sira mu at me undag gwe gwe kintoya. Mu Iesu ampa wakenewa anoyawa, yuwat igiyawa kem egave bog at me uwaya. ⁵⁶ Sira me ainewa at ampa ampa—gwetoimu apa, at koka apa, at diri gampenwa apa—mu yuwat igiyawa gwiruwaremewa arawa apa teya. Mu me gumbe nun waya Iesu wape meuma noibamawa yumpe. Iyayapan yumiyawa mu undag inaimusia.

Oraiwa Ge Miyotapam

7 ¹ Parisi igiyawa ge Gwangwan toewanewan upeba mu Jerusarem apa onamiya mu Iesu empaniya. ² “Mu yawamiya Iesu aigowawa upeba mu nanuwa miyot den muinkapa nakwai neme. ³ Parisi igiyawa ge Ju igiyawa undag mu upanaiwa kuinui muma ag omome, meoya mu nanuwa den muinpewa nakwai den nape. ⁴ “Mu gwiruwaremewa arawa apa taig onampewa mu mumbo kwapuwa den muinpewa divi da den nape. Sira wagobawiwa wakewake mumawa gwangwanepam obiren. Mu ap, noum, ui yaigipama, upeba gaibu muineme.

⁵ Meoya Parisi igiyawa ge Gwangwan toewanewan singui Iesu gumbe waya, “Divi oya ge aigowagwa mu upanaiwa kuinui mumawa gaibu den amat nanuwa miyotapam gumbe nakwai nape?”

⁶ Iesu gara wag dirumne, “Aisaya me ye ugauga ene igiyawa guniyap wanewa baina wane. Me aib tene,

‘Iyayapan mame nouwa muma gumbe ebnotu nenan eme, megara imudanowo muma ne gunap painau.

⁷ Mu imuwa undag ne gunap den waiya eme; mu iyayapan toyau toyau muma mekut toyau muneme.’

⁸ Ye God Gwangwan meuma yan kweyana, iyayapan kuinui mumawa aug ongene.”

⁹ Sira me wag dirumne, “Ye upeaiwa ano muma amat ag ongetan oya God Gwangwan meuma atan barauyana! ¹⁰ “Sira Mosisi wane, ‘Ye mameaiwa ge ineaiwa gumbo ebnotu amuniya.’ sira, ‘Bira da inawa ge mamawa gumbo anokukam apewa me matai tope boape.’ ¹¹ Megara ye vene, apan da inamamawa gumbo aib wape, ‘Dividivi me ne yenan tamnawa me Korban ane’, (Korban me God puyowawa.) ¹² ye me apan gumbe diya inamamawa

^m 6:51 Mak 4:39 ⁿ 7:2 Ruk 11:38 ^o 7:4 Mat 23:25 ^p 7:6-7 Ais 29:13 ^q 7:10 Eks 20:12; 21:17; Deu 5:16

oya divi da den ape. ¹³Mamaib Ye upanaiwa kuinui yeuma gumbe God gae meuma yusi onan ane. Sira mame mina ye obiren ayana.”

¹⁴Iesu sira iyayapan obiren munan auwane menan onamiya, “Ye undag ne watna anoya, mame yaug anoya. ¹⁵Divi da asipa daieve wakenewa me apan danave unikpe me oma den ane apan miyot ape. Megara apan gumbe dauwag onnewa me apan miyot ape.” ¹⁶(-)^s

¹⁷Iesu iyayapan obiren yankwemne sira gwe unig ainewa, aigowawa me gumbe maibe mame oya singui waya. ¹⁸Iesu dirumne, “Ye me kwiyea boredne? Ye den yaug anoyana, divi da me apan danave unignewa me oma den ane me miyot ape? ¹⁹Kuiyawa me apan nonemagawa danave den unikpe, go danave unikpe, meve kwapive uwag aipe.” Iesu me mame waivi, me watabne nakwai undag oraimina.

²⁰Sira me wane, “Divi da apan gumbe uwag oniviwa me apan miyot ape. ²¹Kuiyawa apan danave wakeyawa, sira taibe watna, apan miyot ayawa me nonemagawa gumbe wakeya me dauwag omome. Mu ano kukaeba anoiviwa, vesin apan payaupayau, ub, toenguttan, yaug anogugurivi, ²²nunipama, ano kukam, ugauga, yaug anoguguraiviwa, yano, membo iviwa wai yaivi, warago aiviwa. ²³Kukaeba mame undag apan danave dauwape. Me ape apan miyot ape.”

Sairopenisia Vesin Anotumat Meuma

²⁴Iesu at me yankweg at Taiya^t megiyawa oya aine. Me gwe danave unignewa, me imive iyayapan me den yaug anope, go me oma den ane guwape. ²⁵Vesin da me gwaitawa kusiwa airapu kukaeba aunewa me Iesu oya anone. Me tatevit uwane amave aigne. ²⁶Me at Griisu vesinawa, at Siria Penisia apa yaine. Me Iesu gumbe nun wane airapu kukaeba gwaitawa gumbe dauwag aitan oya.

²⁷“Ud ususiwa kwema namu nape divi undag mu anoemewa,” Iesu wane, “Kuiyawa me oraimina onan ud breidi muma aug kweyau aoretna nape.”

²⁸Vesin garawa wane, “Ayapan, me natawa. Megara, kweyau me teboru ankwatave wakenewa ud ususiwa breidi mumawa musimusiwa nape.”

²⁹Me vesin gumbe wane, “Ge garawa geuma me oraiminavit! Aga. Airapu kukaeba ge gwaitagwa wait yankweg dauwag aine.”

³⁰Vesin gweyawa aine yaune me gwaitawa parao viniviwa. Airapu kukaeba wait me yankweg dauwag aine.

Iesu Naunawa Boredne Noiwa Borednewa Warinamne

³¹Meve Iesu at Taiya yankweg at Saidon uwag aine, meve me sira Gariri poeman gumbe at Dekaporis megiyave uwane. ³²Me

^r 7:15 Apa 10:14-15 ^s 7:16 Namu tenewa uepa ^{V16} oya aib veme. ^{V16}: Apan naunawa gumbe anotan anoiviwa me anope. ^t 7:24 Namu tenewa uepa veme Taiya ge Saidon.

apa, iyayapan upeba apan me nauna boredne sira gae yaimoyai den waiviwa aug Iesu gumbe uwaya. Mu Iesu gumbe nun waya naniwa apan egave barautan oya.

³³Iesu me iyayapan obiren yapowo me atan aune. Me naniguriwa duwam apan nauna nogave enne. Meve me gwitup emne apan pednawa yumne. ³⁴Me kwimin owan yaune anogugut ane wag dine, “Epata!” Me natawa, “Me watapa!” ³⁵Meve apan naunawa watabne. Sira me pednawa bururuwane me amatog gae siwavit wane.

³⁶Iesu gwangwan wag dirumne bira da den dipe. Iesu gae sira dirumne, megara iyayapan egave me oya gae wag amome. ³⁷Iyayapan tet kokavit ag waya, “Me dividivi anewa undag oraiminavit. Nauna borednewa me anone, noi borednewa me gae wane.”

Iesu Iyayapan 4,000 Nakwai Utamne

8 ¹“Kum me apa iyayapan obiren sira agoniyaya, go mu gumbo nakwai onan. Iesu aigowawa munan auwane onamiya. Me mu gumbo wane, ²“Ne iyayapan mame oya danadawai aueni. Mu ne gunap wakeya kum duwamdesi wait onanane, go mu gumbo nakwai onan. ³Ne mu tetna iyagon gwe ampe ipewa, mu ebu taibe matai yangowa viyape uyug aikpe, kuiyawa mu upeba aramavit onamiya.”

⁴Me aigowawa garawa waya, “Mapa gina inguiwa arawa. Ampa nu breddi tamta iyayapan undag mame nape oma ape?”

⁵Iesu singui munne, “Ye guniyap breddi anintom?” mu garawa waya, “Me 7.”

⁶Me iyayapan obiren dirumne piyu gerave yan wakeya. Me breddi 7 tamnawa engaun wanne. Me wasig munne iyayapan namuwo tepe. Mu meib di aya. ⁷Mu gwambui kusikusi upeba mina gaibu. Me me oya gaun wag aigo meuma dirumne keb ag mumpu. ⁸Iyayapan naya oma ane. Ivi aigowawa mu musimusiwa wakeyawa tamiyawa pot 7 enamiya noidauwaya. ⁹Iyayapan 4,000 mina wakeya. Meve Iesu tene amiya.

¹⁰Me wa dana aigowawa gaibu unig aig at Darumanuta oya amiya.

¹¹Parisi igiyawa uwaya mu amatog Iesu singui aya. Me gumbe ageyau atan oya irakoniwa kwiminau toyaumuntan oya nun waya. ¹²“Iesu anogugut ane wane, “Divi oya iyayapan mame garewa mu irakoniwa oya nun veme? Ne natawa diruitna. Irawa da mu gumbo den mumpu.” ¹³Meve me mu yankwemne. Me taig wa danave unigne sira visi gampenwa oya togomiyane.

¹ 7:36 Mak 1:43-45 ² 7:37 Ais 35:5 ³ 8:1-9 Mak 6:35-44 ⁴ 8:12 Mat 12:39; Ruk 11:29

Parisi Igiyawa Iist Mumawa Ge Erod Iist Meumawa

¹⁴Aigowawa brede aug onantanwa oya imuwa atataine, megara brede en desirom di wa danave wakene. ¹⁵^yIesu mu gumbo gwangwan wane, “Yaukapa. Parisi iist muma ge Erod iist meuma gumbo yaukapa.”

¹⁶Mu gae garawa ano ag waya, “Me kuiyawa nu brede gunup onan.” ¹⁷^zGarawano muma Iesu yang anog singui dirumne, “Divi oya brede den auyana oya gae vene? Ye ande den di yauyana den di yang anoyana? Ye nonemagewa yaigiwane? ¹⁸Ye yangewa gaibu, go oma den ane yauya, ye naunewa gaibu, go oma den ane anoya? Sira ye den imugiya? ¹⁹^aNe iyayapan 5,000 oya brede 5 kesanawa, musimusiwa pot noidauwayawa anintom ye tamiyana?” Mu garawa waya, “12.”

²⁰“Sira iyayapan 4,000 oya brede 7 kesanawa, musimusiwa pot noidauwayawa anintom ye tamiyana?” Mu garawa waya, “7.”

²¹Me mu gumbo wane, “Ye ande den yang anoyana?”

Iesu At Betuseida Apa Yanga Bored Apan Warinamne

²²Mu at Betuseida uwayawa, iyayapan upeba yanga bored apan aug onamiya. Iesu me kwapiwa yumtan oya nun gumbe waya. ²³Me yanga bored apan nanive aune sira aug at gwe yankweg dauwag amiya. Apan yangave me gwitup emne sira naniwa me gumbe baraune Iesu singui ane, “Ge divi da yavege?”

²⁴Me meram wane, “Ne iyayapan yawameni. Mu yoma mina a gigeme.”

²⁵Sira Iesu naniwa duwam apan yangawa duwam tene. Meve me yangawa watabne, me yangawa oraimina ane, sira me dividivi undag yaune esine. ²⁶Iesu me baraune gwe aine, wane, “Gwetoimu danave den unig aga.”

Pita Taibe Wane Iesu Me Keriso

²⁷Iesu ge aigowawa at gwe Sesaria Piripi apa amiya. Ebu taibe me singui munne, “Iyayapan veme ne bira?”

²⁸^bMu garawa waya, “Upeba me Babataito abnawa Jon veme, upeba Eraija veme, sira upeba propeta da veme.”

²⁹^cIesu singui wane, “Megara ye anin? Ye vene ne bira?” Pita gara wane, “Ge Keriso.”

³⁰^dIesu mu gwangwan dirumne nenan oya bira da den diya.

^y 8:15 Ruk 12:1 ^z 8:17 Mak 6:52 ^a 8:19 Mak 6:41-44 ^b 8:28 Mak 6:15

^c 8:29 Jon 6:68-69 ^d 8:30 Mak 9:9

Iesu Bo Meuma Oya Namiven Wane

³¹Me meve amatog toyau munne. Apan Usiwa^e dividvi obiren oya edawai aupe sira namuyoiyoi igiyawa ge pirisi koukawa ge Gwangwan toewanewan igiyawa mu me di topayape, sira me tope boape kum duwamdesiyawa sira inaig yoipe. ³²Mame oya me taibe di wane. Pita me Iesu megiyave baraug amatog yaigipam dig wane.

³³Megara Iesu tobiyag aigo meumawa yangut yawamne Pita gumbé gae yaigipam dig wane, “Seitan, daienap uwag aga! Ge God dividivi meuma den anoege, iyayapan dividivi muma anoege.”

³⁴Meve Iesu iyayapan ge aigo meuma auwanewa mu onamiya. Me wane: “Da bira imive ne amanap ontan ape ipewa, me membo di topayape korosi meuma di wan aupe meve ne amanap ompe. ³⁵Kuiyawa da bira imive inaiinai meuma waita wantan apewa me waropiyape, go da bira inaiinai meuma nenan oya ge gae oraiwa oya waropiyapewa me waita wampe. ³⁶Apan me piyu mame undag aupe, go guwawa meuma waropiyapewa oraiwa meuma aninin? ³⁷Apan me guwawa meuma sira autan oya me divi da garawa wampe? ³⁸Uinan taraki ge kukaeba eme kum mame gare danave, da bira nenan ge gae neumawa oya ubmam apewa, Mamawa eyawa meuma danave Apan Usiwa me aneya iyakaisi gaibu uwapewa kumiwa apa me apan asime gumbé ubmam ape.”

9 ¹“Sira Iesu mu gumbo wane, “Ne natawa diruitna. Mapa yokeyawa yapowo upeba mu God toimuwawa yusiwa gaibu onivi yaupe, ivi mu boriruwape.”

Iesu Irawa Biroriyane

²Oiyat 6 onananewa, Iesu me Pita, Jemus ge Jon tam tui painau dog amiya. Me apa undag mukut wakeya, sira mu namuwo me irawa biroriyane. ³Me wapeyawa biroriyane di puipuiyuren ane. Bira da oma den ane mame mina wape puipuyuiren ape piyu mame danave. ⁴Meve Eraija ge Mosisi mu namuwo uwaya. Mu Iesu gaibu gae veme.

⁵Pita Iesu gumbé wane, “Rabai, mapa nu waketu me oraimina. Mapa nu tent^j duwamdesi siyamta—desirom genan oya, desirom Mosisi oya ge Eraija oya.” ⁶(Me den yang anone anin watan, mu di teraya.)

⁷Meve irikup uwane mu undag umamne, sira noiwa irikup danave uwane: “Mame ne Utunwa nonenmagawa. Me gumbé anoigimiya!”

⁸Mu tatevit yangut birorot ayawa, da bira mu gaibu den yauya. Iesu mekut yauya.

^e 8:31 Me Iesu Keriso. ^f 8:34 Mat 10:38-39; Ruk 14:27 ^g 8:38 Mat 10:33

^h 9:1 Mak 13:30 ⁱ 9:2-7 Apa 3:22; 2Pi 1:17-18 ^j 9:5 Namu tenewa dawa me tabenako waivi. Tent me gugup gweyawa mina. Me wape yaigipam kokawa gumbé siyawa.

⁹Mu tui apa aig omomewa, Iesu mu gae yusipam dirumne, da bira den diya divi mu yauyawa, me wakepe Apan Usiwa bo gumbe sira yoig wanekpeve. ¹⁰Mu me yauyawa mukut yumnasiya. Mu gae garawano aya bo apa sira yoig wanekpe me natawa divi.

¹¹^kSira mu me gumbe dig waya, “Divi oya Gwangwan toewanewan muma waya me Eraija namu di uwape?”

¹²^lIesu garawa wane, “Natawa di, Eraija namu uwape, sira dividivi undag waribiyape. Divi oya gigirum tene me Apan Usiwa edawai kokavit autanit di sira topayape? ¹³^mMegara ne diruitna. Eraija wait uwane. Mu dividivi undag anoemewa me gumbe aya, me namu menan gigirum aninin tene mina.”

Iesu Ud Airapu Kukaeba Gaibuwa Warinamne

¹⁴Mu aigo meuma upeba gumbo uwaya. Mu yauya iyayapan obiren mu gumbo aoreg wakeya, sira Gwangwan toewanewan igiyawa mu gaibu garadi eme. ¹⁵Iyayapan undag Iesu yauyawa tatevit mu di terake gaun wantan oya menan kin tog amiya.

¹⁶Me dirumne, “Ye mu gaibu divi oya garadi ene?”

¹⁷Iyayapan obiren yapowo apan da garawa wane, “Toewanewan, ne ud neuma genan aug onegna. Me airapu kukaeba danave unigne gae watan oma den ane. ¹⁸Airapu kukaeba yumtan oya aiviwa me piyu gumbe aorene aigivi. Me noiwa poriman dauwaivi, donawa kitosiaivi, sira kwapiwa kwatataine. Ne aigo geuma gumbo nun wana airapu kukaeba atataitan oya dirumna, go mu oma den ane.”

¹⁹Iesu garawa wane, “A, iyayapan garewa anotumat den eme! Kum anintom mina ne ye gaibu waketna? Kum anintom mina ye guniyap ne iyagit waketna? Ud nenan aug oneya.”

²⁰Meve mu ud aug onamiya. Airapu me Iesu yaunewa, tatevit ud aorene daramdaram ane sira piyu egave aorene aigne bautoivi, noiwa poriman dauwaivi.

²¹Iesu ud mamawa dine, “Kum anintom me mamaib ane?” “Ud torave apa,” me garawa wane. ²²“Kum evedni airapu kukaeba me toin guttanwa oya yoma yangave aorene sira yoi dana aorene. Megara ge oma ape ipewa, nu ano nuna sira waita nuna.”

²³ⁿIesu wane. “Ge wana, ‘Ge oma ape ipewa?’ Bira da anotumat apewa oma ane dividivi undag ape.”

²⁴Ud mamawa tatevit gambena wane, “Ne anotumat eni. Waita nega anotumat den eniwa biroriyag anotumat oraimina atna!”

²⁵Iesu iyayapan obiren kin tog omome yawamnewa me airapu kukaeba gumbe wakakae ane. Me wane, “Ge nauna bored ge noi bored

^k 9:11 Mak 3:1 ^l 9:12 Sam 22:1-18; Ais 53:3; Mak 4:5-6 ^m 9:13 Mat 11:14

ⁿ 9:23 Mat 21:21; Mak 11:23

airapuwawa, ne ge gungap gae yusipamit veni, me gumbe dauwag aga me danave sira den uniga.”

²⁶°Airapu kwaruwane, kwapiwa kwatataine me gumbe yankweg dauwag aine. Ud kwapiwa yauya bo kwapiwa mina di, undag waya, “Me boane.” ²⁷Megara Iesu nanive aune me enagadne amave wan yoine.

²⁸Iesu gwe dana unig aine. Meve aigowawa me gumbe mukut singui aya, “Divi oya nu oma den ane vete dauwag aipe?”

²⁹Iesu garawa wane, “Ebu mamaiba oma ane dauwag aipe nun gumbe mekut.”

³⁰°Mu at me yankweya Gariri uwag kweyag amiya. Iesu imive iyayapan da den yaug anope mu ampa wakeya. ³¹°Kuiyawa me aigowawa toyau munivi, me wane, “Apan Usiwa ominawa iyayapan nanuwo baraupe. Mu tope boape, sira kum duwamdesiyawa sira inaig yoipe.” ³²°Megara mu den yaug anoya me anin wanewa sira mu me oya Iesu gumbe singui den waya. Mu a aya.

Kokavitwa Me Bira

³³Mu at Kapenaum uwaya. Me gwe danave unig ainewa, Iesu amatog singui munne, “Ye ebu taibe divi oya garawa anoene?” ³⁴Megara mu di iyadmusia, kuiyawa ebu taibe mu danowo kokawa bira me oya diguragut aya.

³⁵°Me yan wakenewa, Iesu aigo meuma 12 munan auwane onamiya sira dirumwane, “Da bira namu yoitan imive wakepewa, me di virioiyeba apa yoipe. Me iyayapan undag yapowo nau abnawa ape.”

³⁶Me ud kusi da aune, sira me ane yapowo yokene. Me vitave aune mu gumbo wane, ³⁷°“Da bira me ud ususiwa da gumbe ne ivunwa gumbe engaun apewa, me ne gunap engaun ape; sira da bira me ne gunap engaun apewa, me ne gunap engaun den ape ne baraunedne onegnawa gumbe engaun ape.”

Da Bira Nu Gunup Daietai Den Anewa Me Numawa

³⁸Jon wane, “Toewanewan, nu apan da yautu, airapu kukaeba ge ivugwa gumbe wane dauwag amiya. Nu me yankwetan oya ditu, kuiyawa apan me numawa onan.”

³⁹Iesu wane, “Me den toboriya. Da bira ne ivunwa gumbe irayauyau apewa, irayauyau onanapeve oma den ane nenan oya gae kukaeba da wape. ⁴⁰°Kuiyawa da bira me nu gunup daietai den anewa me numawa. ⁴¹°Ne ye natawa diruitna. Da bira anone ye Keriso meumawa,

° 9:26 Mak 1:26 P 9:30 Jon 7:1 ° 9:31 Mak 8:31; 10:32-34 † 9:32 Ruk 9:45

* 9:35 Mat 20:25-27; Mak 10:43-44; Ruk 22:24-26 † 9:37 Mat 10:40 ° 9:40 Mat 12:30; Ruk 11:23 ° 9:41 Mat 10:42

me oya me yoi ap me ne ivunwa gumbé yempéwa, natawa di garawa meuma matai den di waropiyape.

Ape Kukaeba Atanwa

⁴²“Megara bira da ud kusi mame ne gunap anotumat anewa desirom da ano gwambe toyau wampéwa, an kokawa me parawa waremewa me meyave tug poeman danave aorepe none nape, me me oya me baina. ⁴³”Nanigwa ape ge kukaeba a ipéwa, kwagomiyag epa aoreya. Me oraiwa ge gungap kwapugwa kukaipéwa inaiinai danave unig aga, go me kukaine nanigwa duwam gaibu aig at kukaeba geena^x me iyam yaibobot igiviwa danave aiga. ⁴⁴(-)^z ⁴⁵Sira amagwa ape ge kukaeba a ipéwa, kwagomiya. Me oraiwa ge gungap ge amagwa desirom gumbé inaiinai danave unig aga, go me kukaine me amagwa duwam gaibu at kukaeba geena danave aore gempe aiga. ⁴⁶(-)^z ⁴⁷“Sira, yangagwa ape ge kukaeba a ipéwa, topukiyag atan aoreya. Me oraimina ge gungap ge yangagwa desirom gumbé God toimuwawa unig aga, me oraimina, megara yangagwa duwam gaibu aore gempe at kukaeba geena danave aigawa me kukaine. ⁴⁸^bMe apa, “Nagam den borirueme, sira iyam den botoivi.”

⁴⁹Iyayapan undag matai iyam gumbé siuran mina ape.

⁵⁰“Siuran me oraimina, megara me demtawa meuma onanape ipéwa, ye aninin aya demtawa sira ape? Siuran daneyap auya, undag yum gumbé wakeigimiya.”

Memgebip Garakue

10 ¹Iesu at meve kweke at Judia aine, Jodan togomiyane. Sira iyayapan undag me gumbé uwaya. Kum evedni toyau muniviwa mina mu toyau munne.

²Parisi igiyawa upeba me gumbé uwaya amaorot aya, “Apan me biviwa gaibu garakue atan me Gwangwan gumbé baina wane?”

³Me garawa wane, “Mosisi Gwangwan aninin yenne?”

⁴“Mu waya, “Mosisi apan meib baina wane, ‘Memgebip garakue oya vesin yankwetan gigurumawa teg wana kwegem vesin aipe.’”

⁵“Mosisi Gwangwan mame yenan tene, kuiyawa ye nonewa yaigiwa dadi.” Iesu garawa wane. ⁶“Megara wait namui ren dividivi wad tenewa, God apan ge vesin wad temunne. ⁷”Kuiyawa mame oya, apan mamawa

^w 9:43 Mat 5:30 ^x 9:43 Anotumat onan igiyawa mu at mame matai unikpe.

^y 9:44 Namu tenewa upeba V48 mina veme. ^z 9:46 Namu tenewa upeba ^{V46} gaibu. Me tene, “Nagam den borirueme, sira iyam den botoivi.” ^a 9:47 Mat 5:29 ^b 9:48 Ais 66:24

^c 9:50 Mat 5:13; Ruk 14:34 ^d 10:4 Deu 24:1-4; Mat 5:31 ^e 10:6 Gen 1:27; 5:2

^f 10:7-8 Gen 2:24; Epe 5:31-33

ge inawa yankwe munke biviwa gumbe yunatpe, ⁸sira apan ge vesin mu kwapuwa desirom ape. Meoya mu duwam onan, mu desirom. ⁹Meoya God toboranewa, apan oma den ane tam ubeube tepe.”

¹⁰Meve mu gwe danave wakeyawa, aigowawa mame oya singui waya. ¹¹⁸Iesu gara wane, “Bira da biviwa yankwepe sira vesin da ube aupewa, me vesin namuwa gumbe uinantaraki. ¹²Sira vesin memawa gumbe yankweg, apan da ube aupe ipewa, me memawa namuwa gumbe kukaeba atan aivi me uinantaraki aivi.”

Ud Usiusiwa Ge Iesu

¹³Iyayapan ud usiusiwa tam Iesu gumbe uwaya. Mu imuwo Iesu ud usiusiwa yumam waribiyak muntan oya. Megara Iesu aigo meumawa gae yusipamit mu dirumiya. ¹⁴Iesu mame yaunewa danapiriwane mu gumbo wane, “Ud usiusiwa yan kwemiya nenan onampe, sira mu den toboriya. Kuyawa God toimuwawa iyayapan meiba mu mumawa. ¹⁵^hNe natawa diruitna. Da bira me ud usiusiwa mina God toimuwawa den aupewa den di God toimuwawa unikpe.” ¹⁶Sira Iesu ud usiusiwa bog agoniya munne, egowo naniwa barauk waribiya munne.

Apan Mataiwa Tawara Abnawa

¹⁷Iesu amatog ebu taibe aivinewa, apan da me kintog gumbe uwane, me namive konive yug dine, “Toewanewan oraiwa, divi akape inaiinai yaibobot auten?”

¹⁸“Divi oya wana, ne oraiwa?” Iesu garawa wane. “Da bira oraimina onan, me God mekut. ¹⁹ⁱGe Gwangwan yaug anoana. ‘Den toengura, uinantaraki den a, ub den a, gae ugauga den wa, den ugai mun dividivi muma tamigima, inag mamag gumbo ebnotu aigima.’ ”

²⁰Sira me wane, “Toewanewan, ne undag mame wait ud toranap gumbe yumnad onedna.”

²¹Iesu me yangurag danadawai gumbe wane. “Ge anoano geuma desirom da gumbe yan aigana. Aga dividivi undag ge gungap wakeyawa tam guiruwara sira tawara onan igiyawa muna, ge kwiminau garawa oraivitwa auwa. Meve amanap onaga.”

²²Me kumive, apan mame kwanawa sig ginawa butuine. Me danadawai gumbe aine, kuyawa me tawara kokavit gaibu.

²³Iesu tobiyag aigo meuma yawam wane, “Tawara abnawa me God toimuwawa uniktanwa me yaigiwa dadi!”

²⁴Aigo meumawa Iesu gaiyawa gumbe anog teraya. Iesu sira wane, “Ud neumawa, God toimuwawa uniktanwa me yaigiwa dadi. ²⁵Mae kameru me inup nogawa uniktanwa me taibe, megara tawara abnawa me God toimuwawa uniktanwa me yaigiwa dadi.”

⁸ 10:11 Mat 5:32 ^h 10:15 Mat 18:3 ⁱ 10:19 Eks 20:12-17; Deu 5:16-20

²⁶Aigo meumawa mu di teraya, sira gae garawano aya, “Bira da oma ane waita aupe?”

²⁷Iesu mu yawam wane, “Apan me gumbe mame oma den ane, megara God gumbe oma ane. God dividivi undag oma ane.”

²⁸Pita me Iesu gumbe wane, “Nu dividivi undag yankweg amagap ongete!”

²⁹“Ne natawa ye diruitna,” Iesu garawa wane, “Bira da me nenan sira Gae oraiwa oya gwe, tatawaiwa, yogeyawaiwa, inawa, mamawa, usitainawa go nauwawa yankwempewa, ³⁰me kum garewa danave koniwa 100 mina aupe,—gwe, tatawaiwa, yogeyawaiwa, inawaiwa, usitainawa, nauwawa—sira edawai gaibu aupe—, kum mataiwa danave inainai yaibobot aupe. ³¹“Megara iyayapan obiren namu yoiemewa mu ivi ape, sira ivi yoiemewa mu namu ape.”

Iesu Bo Meuma Gaiyawa Sira Wane

³²^kMu dauwag Jerusarem dog amomewa Iesu me namu yoine, aigowawa undag teraya. Mu amowo amomewa undag a aya. Me aigowawa 12 tam megiyave tene, dirumne divi da me gumbe matatpewa. ³³Me wane, “Nu Jerusarem angete, sira Apan Usiwa matai pirisi koukawa ge Gwangwan toewanewan igiyawa gumbo anavi ape. Mu me bo atan oya dima yug baraupe, sira me aug Ju onan igiyawa gumbo baraupe. ³⁴Mu me gumbe yano wampe sira gwitup me gumbe emkwampe, murap gumbe tope, meve toengutpe. Kum duwamdesiyawa, sira inaig yoipe.”

Jemus Ge Jon Anoemewa

³⁵Jebedi usitainawa Jemus ge Jon mu Iesu gumbe uwag waya, “Toewanewan, nu imunup divi da nun gungap watawa nunan ge a.”

³⁶“Dimbae da ne yenan oya aten?” me singui wane.

³⁷Mu garawa waya, “Ge wag didnuna. Eyawa geumawa danave desirom nanigwa yutanwa apa wanekpe, sira dawa nanigwa ketaiwa apa wanekpe.”

³⁸^l“Dimbae oya nun venewa ye me den yaug anoyana,” Iesu wane. “Ye oma ane yoi ap ne natnawa ye me naya, sira babataito me ne autnawa ye oma ane auya?”

³⁹^m“Nu oma ane,” mu garawa waya. Iesu mu dirumne, “Ne ap neuma gumbe yoi natnawa ye naya, sira babataito me ne autnawa ye me gumbe babataito auya. ⁴⁰Megara ne naniyutanwa go naniketaiwa waketanwa me ne oma den ane yentna. At meiba bira God munan tamibarip anewa mu munan.”

^j 10:31 Mat 20:16; Ruk 13:30 ^k 10:32-34 Mak 8:31; 9:31 ^l 10:38 Mak 14:36; Ruk 12:50

^m 10:39 Apa 12:2; Rev 1:9

⁴¹Aigo meumawa 10 mu gae mame anoyawa, Jemus ge Jon gumbo danopiriwane. ⁴²Iesu munan auwane agoniyaya, wane, “Ye yang anoyana, Ju onan namuyoiyoi igiyawa mu iyayapan amat amuniya, sira iyayapan koukawa mu yutuwa painauvit iyayapan gumbo eme. ⁴³Megara ye gaibu onan. Ye bira da ye guniyap kokawa atan anoyawa me iyayapan ankwatowo nau aya, ⁴⁴sira bira da namuyoiyoi atan oya anoiviwa, me iyayapan undag munan ankwatave nau aiviwa atanit di. ⁴⁵Kuiyawa Apan Usiwa iyayapan nau meuma atan oya den aig onne, megara me iyayapan munan nau atan oya sira inaiinai meuma wampe iyayapan obiren kukaeba muma oya garawa atan oya aig onne.”

Yangabored Barutimias Sira Yaune

⁴⁶Meve mu at Jeriko uwaya. Iesu ge aigowawa iyayapan obiren gaibu gwetoimu kweemewa, yangabored abnawa Barutimias (Natawa me Taimias usiwa), me ebu megiyave yan wakeg dividivi oya nun waivi. ⁴⁷Meve me yang anonewa me Nasaret apan Iesu, me amatog kwaruwane, “Iesu, Devid Usiwa, ano nega!”

⁴⁸Iyayapan obiren me diyag waya, sira me dig waya nogwa iyadgita, megara me kwaruwagewa ane, “Devid usiwa, ne ano nega!”

⁴⁹Iesu tumag yoig wane, “Au menan waya,” mu apan yangabored oya auwaya, “Yutugwa auwa. Wan yoiya. Me genan auwaivi.” ⁵⁰Enwape meumawa epa aorene, sira me amave pisiag wan yoig Iesu gumbe onne.

⁵¹Iesu me singui wane, “Ge imugap ne dimbae genan atna?” Yangabored apan wane, “Rabai,^p ne yautan anoeni.”

⁵²Iesu me gumbe wane, “Aga. Anotumat geuma warinam genne.” Me tatevit yangawa oraimina ane, Iesu amave ebu taibe aine.

Iesu Eyawa Gumbe Jerusalem Unig Aine

11 ¹Mu at Jerusalem uweme tui Orivu kuiyave at Betepage uwayawa, Iesu aigowawa duwam tene amiya, ²dirum wane, “Gwetoimu da namuyep aisiya. Ye me unigiyawa, eme apa mae donki mataiwa me gerave bira da den dauwanewa murap gumbe tuya wakene ye yauya. Murap atan vesiya, sira aug mame oneya. ³Da bira ye guniyap singui aib wapewa, ‘Ye divi oya mae donki mataiwa murap tuyawa vetene?’ me gumbe aib waya, ‘Ayapan imive wakene. Me sira baraupe koni kusi da mapa ompe.’”

⁴Mu amiya sira donki usiwa me ebu taibe ankwini gumbe murap tuya wakenewa yauya. Mu murap vetemewa, ⁵iyayapan upeba asimeve yokeyawa mu dirum waya, “Ye divi oya donki usiwa murap vetene?”

ⁿ 10:42 Ruk 22:25-26 ° 10:43 Mat 23:11; Mak 9:35 ^p 10:51 Natawa me toewanewan.

^q 10:52 Mak 5:34

⁶Mu Iesu dirumne mina garawa wayawa mu baina waya. ⁷Mu donki usiwa Iesu gumbé aug uwaya. Mu wapé gerawewa mumawa donki gerawe emeya, Iesu me gerawe dauwag wakene. ⁸Iyayapan obiren wapé gerawewa mumawa ebu taibe yayabeyaya, sira upeba mundana yoma naniwa kesiag ebu taibe yayabeyaya. ⁹Iyayapan namive yoig amomewa amawe yoiemewa mu kwaruwaya, “Osanna! Apan me Ayapan iviwa gumbé uwapewa, me gumbé waribiya wakeigimpe!”

¹⁰“Mamunwa Devid kin arawa meuma me oniviwa, me gumbé waribiya wakeigimpe!

Osanna at painauren danave!”

¹¹Iesu Jerusarem aig temporu arawa unig aine. Me atan yang man yang dividivi undag yaune. Kum wait onanane, me aigowawa ¹²gaibu dauwag Betani amiya.

Iesu Temporu Muinne

¹²Wantene mu Betani kweemewa, Iesu iyagon adne. ¹³Me painau yangurane inaru kwayawa gaibu yaune. Magawa da gaibu go onan me yautan aine. Inaru gumbé uwanewa, me yaune magawa onan, kwayawa mekut, kuiyawa inaru kumiwa onan. ¹⁴Meve Iesu yoma gumbé wane, “Da bira matai ge magawa geuma den nape.” Me waiviwa aigowawa anoya.

¹⁵Jerusarem uwaiviwa Iesu temporu arawa unigne, Iesu temporu arawa unignewa, iyayapan mu gwiruwaremewa ge garawa emewa amatog atatai imne dauwag amiya. Me teboru me anmaga biroriyag auemewa sira umuk gwiruwaremewa undag aug tobiyane. ¹⁶Da bira baina gumbó den wane gwiruwaremewa muma tam temporu arawa danave unig dauwag ampe. ¹⁷“Sira me mu toyau mum wane, “Me da den tene? ‘Ne gwe neuma wapé nun gweyawa iyayapan undag oya.’ Megara ye ayana me yuaore toaore igiyawa dagup muma mina ane.” Meib tene.

¹⁸“Pirisi kouwawa ge Gwangwan toewanewan igiyawa mame anoyawa mu amatog toatan oya ebu didimama aya. Kuiyawa mu Iesu gumbé a aya, natawa iyayapan undag me Iesu toewanewan meuma gumbé degadega eme.

¹⁹At augoi adnewa, mu gwetoimu kokawa yankweg dauwag amiya.

Yoma Inaru Toyaine

²⁰Mumbevit mu yoma inaru megiyave uwag amomewa, mu yayua yoma inaru taiwa gaibu undag toyaine. ²¹Pita meve imug anone Iesu gumbé wane, “Rabai, Yawa! Yoma inaru me ge yawag wanawa me toyaine!”

^r 11:9 Sam 118:25-26 ^s 11:13 Ruk 13:6 ^t 11:17 Ais 56:7; Jer 7:11 ^u 11:18 Mak 14:1

22 “God gumbe anotumat a,” Iesu garawa wane. 23 v “Ne natawa diruitna. Bira da tui mame gumbe aib wapewa, ‘Aga, poeman danave aiga,’ sira me nonemagawa apa anopipanum den ape me membo wanewa pawape anotumat apewa, me gumbe pawape. 24 w “Meoya ne ye diruitna. Divi da oya nun wayanawa, me ye wait auyana anotumat ayawa me yeumawa ape. 25 x “Ye wan yoig nun waigimiyawa, ye bira da gumbe anokukam ag a ayawa, kukaeba meuma anog yankweya. Meib aya ipewa Mamewa kwiminauwa me mina ye kukaeba yeuma anog yankwepe.” 26 (-) y

Iesu Yusiwa Meuma Oya Singui Waya

27 Mu sira Jerusarem uwaya. Iesu temporu arawa danave yoig gigiviwa, piri si koukawa, Gwangwan toewanewan igiyawa sira namuyoiyoi igiyawa me gumbe uwaya. 28 Mu singui waya, “Ge dividivi mame egewa divi yusiwa gumbe ege? Sira yutugwa mame bira genne?”

29 Iesu garawa wane, “Ne singui desirom yentna. Ye garawa didnegiya, ne matai ye diruitna ne divi yusiwa gumbe dividivi mame eni. 30 Jon babataito meumawa me kwimin apa onne go iyayapan gumbo onne? Ne didnegiya!”

31 Mu mumbovit gae wageyau aya, sira waya, “Nu aib wata ipewa, ‘Kwimin apa onne,’ me matai wape, ‘Divi oya ye anotumat me gumbe den ayana?’ 32 Sira nu aib wata ipewa, ‘Iyayapan gumbo onne?...’” (Mu iyayapan gumbo a aya, kuiyawa iyayapan undag yumnasiya Jon me propeta da.)

33 Meoya mu Iesu gumbe garawa waya, “Nu den yaug anotu,” Iesu wane, “Ne mina ye den diruitna yutunwa divi gumbe ne mame eni.”

Nau Igiyawa Maibeyawa

12 1 z Iesu maibe gumbe amatog wag dirumne. “Apan da greip a nau meuma vedne. Me si birorot panne, sira wain gotosatanwa oya dukup sine, sira wakeg amaraigimtan gweyawa sine. Meve nau wareme igiyawa mu amaraigimpe me membo at da aine. 2 Maura kumiwa uwane. Me nau meuma aiviwa baraune nau amareme igiyawa gumbo greip nauwawa danave greip kwerawa botan oya aine. 3 Megara mu nau meuma aiviwa yum tug tog naniwa ingui barauya aine. 4 Meve me nau abnawa meuma da munan baraune aine. Mu me kuiyave tog ano ubmameba me gumbe aya. 5 Me ande da sira baraune aine, sira mu me

v 11:23 Mat 17:20 w 11:24 Mat 7:7 x 11:25 Mat 6:14-15 y 11:26 Watavit ampa namu tenewa upeba v26 apa mameib waivi, “Megara ye iyayapan upeba kukaeba mumawa den anog yankweyawa, Mamewa kwiminauwa me mina kukaeba yeumawa den anog yankwepe.” z 12:1 Ais 5:1-2 a 12:1 Greip magawa gumbe wain wareme.

toenguriya boine. Sira me upeba obiren tene amiya. Upeba mu guriya, upeba guriya boriruwaya.

⁶Me desirom me baraupe aipewa wakene, me usiwa me nonemagawa. Me oieba baraupe aine, wane, ‘Mu ne utunwa ebnotu wampe.’

⁷Megara nau igiyawa garawano aya, ‘Mame me kwan autanwa abnawa. Oneya me tota boipe, meve me dividivi meuma numawa ape.’ ⁸^bMeoya mu auwag toya boine, sira me greip nau meuma daieve aoreya.

⁹Meve greip nauwawa kuiya mamawa membo me dimbae ape? Me taig ompe nau igiyawa mu gutpe sira greip nau meuma iyayapan upeba mumpe. ¹⁰^cYe gae mame Baiboru danawewa den yang basiene?

‘An me gwe sisi igiyawa topayayawa
me an natawa kokawa me visidonawa apa teyawa mina ane.

¹¹Mame Ayapan ane,
nu yangunup yautunewa me oraimina me da den kukaine.’”

¹²Meve mu Iesu aug totan oya ebu diuya, kuiyawa me maibe gumbe munan dirumnewa mu anoya. Megara mu iyayapan undag munan a aya. Meve mu Iesu yankweg amiya.

Siisa^d Gumbe Takesi Tetanwa

¹³^eIvi mu Parisi igiyawa ge Erod igiyawa upeba Iesu oya teya amiya, Iesu gae meumawa gumbe yumtan oya. ¹⁴Mu Iesu gumbe onamiyawa, waya, “Toewanewan, nu yang anotu ge apan natawa. Sira iyayapan oma den ane ge augempe. Kuiyawa ge mu den yawam anoana mu bira, ge natawa gumbe God ebuwawa toyaumunege. Siisa gumbe takesi garawa apewa me oraimina go onan? ¹⁵Nu garawa ata go nu garawa den ata?” Megara ugauga mumawa Iesu yang anone, me singui munne, “Ye divi oya ne aunegatan oya ageyau ene? Denari^f aug oneya yautna.” ¹⁶Mu anmagawa aug onamiya sira me singui munne, “Mame bira guwawa? Sira bira tenewa?” “Siisa meuma,” mu garawa waya.

¹⁷^gMeve Iesu mu gumbo wane, “Siisa meumawa Siisa waniya, sira God meumawa God waniya.” Mu me gumbe teraya.

Sira Inaig Yoinewa Ge Memgebip

¹⁸^hMeve Sadusi igiyawa mu veme bo gumbe sira den inaipe. Mu Iesu gumbe uwag singui waya, ¹⁹ⁱ“Toewanewan, Mosisi nunan tene, ‘Apan tatawa botopewa sira kwapuraeba yankwenewa ud onanwa, me gwaneba kwapuraeba autanit di sira tatawa oya ud tepe.’ ²⁰Gare tatawaiwa undag 7 wakeya. Tatawa namuwa vesin aug me boane, ud onan. ²¹Duwameba

^b 12:8 Ibr 13:12 ^c 12:10-11 Sam 118:22-23 ^d 12:13 Me Romu ayapaneba.

^e 12:13 Ruk 11:53-54 ^f 12:15 Apan da oiyat desirom nau apewa, denari desirom aupe.

^g 12:17 Rom 13:7 ^h 12:18 Apa 23:8 ⁱ 12:19 Deu 25:5

kwapura aune megara me mina boane, ud onan. Duwamdesiyawa mina meib. ²²Mamaib onamiyawa, apan 7 ud onan. Oieba, vesin gaibu botone. ²³Sira mu yoipewa kumiwa apa, vesin me undag 7 danave bira biviwa ape, kuiyawa mu undag vesin me auya?”

²⁴Iesu garawa wane, “Ye gwambe yaug anoyana, kuiyawa ye Baiboru ge God yusiwa den yaug anoyana. ²⁵Wanampa boriruwawaya yoig wanekpewa, apan vesin den aupe, sira vesin apan den aupe, kwimin danave mu matai aneya mina wakepe. ²⁶Boriruwawaya yoig wanektan oya, Mosisi buka meuma danave, mundana apa God me Mosisi gumbe anin wanewa ye den basiyayana? ‘Ne Eburam God meuma, Aisak God meuma sira Jakob God meuma.’ ²⁷Me bo igiyawa God muma onan, megara me kaninga wakeemewa God muma. Ye gwambe di ene!”

Gwangwan Kokavitwa

²⁸^kGwangwan toewanewan desirom da uwane. Me Iesu gae garawa eme anone yaug anone Iesu garawa oraimina munne, me wag dine, “Gwangwan undag danave natawa kokavitwa me ambuwa?”

²⁹^lIesu garawa wane, “Kokavitwa me mame: ‘Isuraeru anoya. Ayapan God numa me Ayapan desiromiren. ³⁰Nonegmagawa undag gaibu, guwawa geuma undag gaibu, imugwa undag gaibu, yutugwa undag gaibu, Ayapan God geuma gumbe baigan a.’ ³¹^mDuwameba me mame. ‘Ge iyayapan baigan munigima ge gembo baigan niege mina.’ Gwangwan kokavitwa mame minawa da den wakene.”

³²Apan me garawa wane, “Ge baina wana, toewanewan. ‘God desiromiren sira da ube onan, me mekut. ³³ⁿNonegmagawa undag gaibu, anoano geuma undag gaibu, yutugwa undag gaibu, me gumbe baigan a’, sira ‘Ge iyayapan baigan munigima ge gembo baigan niege mina,’ Mame oraiminavitwa. Mae puyo okeremewa ge nakwai teemewa me mina onan.”

³⁴Iesu yaunewa me garawa oraivit wane, me gumbe wane, “Ge God toimuwawa apa arama den wakeyana.” Kum me ivi, bira da Iesu gumbe singui da watan den anone.

Keriso Me Bira Usiwa

³⁵Iesu temporu arawa apa toyau muniviwa me singui munne, “Aninin Gwangwan toewanewan igiyawa veme Keriso me Devid usiwa? ³⁶^oDevid membo waivi Guwawa Iyakaisiyapama gumbe taibe wane:

‘Ayapan me Ayapan neuma gumbe wane:

“Nanin yutanwa apa wakeigima,

^j 12:26 Eks 3:2,6 ^k 12:28 Ruk 10:25-28 ^l 12:29-30 Deu 6:4-5 ^m 12:31 Rvt 19:18

ⁿ 12:33 1Sm 15:22; Ose 6:6 ^o 12:36 Sam 110:1

ivi anavi geuma amagwa ankwatave ne tetna.” ’

³⁷Devid membo Keriso gumbe Ayapan wane, aninin Keriso me Devid usiven ape?” Iyayapan obiren me gumbe degadegaepam anoeme.

³⁸Iesu toyau muniviwa me wane, “Gwangwan toewanewan igiyawa oya yaukape. Mu imuwo wape yobutaren oraivitwa enam gwiruwaremewa arawa apa birerot gigimpe iyayapan engaun mumppe.

³⁹Sira mu imuwo sinagogu danave seya painauwa waketan anoeme sira buyunai nemewa at painauwa apa waketan anoeme. ⁴⁰Mu kwapura gweyowa apa iyab muneme, sira iyayapan yawamtan oya nun yobenut veme. Iyayapan meiba mu matai ibnapamit nau mumppe.”

Kwapura Puyo Meuma

⁴¹Iesu puyo barauemewa arawa gambena apa yan wakene, iyayapan anmaga temporu puyo teemewa danave teeme yaune. Tawara igiyawa obiren anmaga koka teeme. ⁴²Megara kwapura gwandakwaeba uwane me anmaga kopa kusiwa reputa^p duwam tene. Anmaga reputa duwam garawa me anmaga kodorant desirom.

⁴³^qIesu aigo meuma auwane mu onamiya. Me wane, “Ne ye natawa diruitna. Kwapura gwandakwaeba mame me puyo teemewa danave puyo obiren tene, iyayapan upeba undag mina onan. ⁴⁴Mu tawara egave em yoiya. Megara kwapura mame me undag me gumbe wakeg aigimtanwa meme tene.”

Kum Oieba Irakoniwa

13 ¹Iesu me temporu arawa yankweg dauwag aitan aiviwa, aigo meuma desirom da me gumbe wane, “Yawa, toewanewan! An kouka! Gwe oraimina!”

²^r“Ge gwe kouka undag mame yavege?” Iesu garawa wane, “An desirom da mapa dawa egave den wakepe; an undag gwiriruwag aikpe.”

³Temporu gambena apa, Iesu tui Orivu kuiyave wakenewa, Pita, Jemus, Jon ge Andru mukuren me gumbe singui waya, ⁴“Didnuna, kum divi dividivi mame pawape? Sira undag mame pawatan aigimpewa irakoniwa aninin?”

⁵Iesu mu gumbo amatog wane, “Yaukape iyayapan da ye den uga yempe. ⁶Obiren ne ivunwa gumbe uwape, waigimpe, ‘Ne me,’ sira obiren ugai mumppe. ⁷Wanampa mut gaiyawa ge kigemuk mut oya anoyawa, me den teraya. Dividivi meiba pawatanit di, go oieba oya me matai uwape. ⁸At sinsin igiyawa mu at sinsin igiyawa dawa gaibu matai yoig mut watpe, sira at kokawa me at kokawa dawa gaibu matai yoig mut watpe.

^p 12:42 128 reputa me 1 denari. Apan oiyat desirom nau apewa 1 denari aupe.

^q 12:43 2Ko 8:12 ^r 13:2 Ruk 19:44

At upeba gumbe matai iyagon ge pinunu ape, sira iyagon kumiwa uwape. Undak mame ud yaitan dawaiba amatoiviwa mina.

⁹Ye yembovit amaraya. Iyayapan ye tam teempe daiboru yemboa nanuwo, sira sinagogu danave gurepe. Sira ne nau neumawa oya ye amareme igiyawage kin yeuma mu namuwo yoiya. Me dividivi undag ye yauyanawa mu dirumtan oya. ¹⁰Gae oraiwa namuiren dig gwetoimu undag gumbo opata wape. ¹¹Mu ye da tuepewa sira nanuwo te yempewa, namu gae anin watan oya den anoya. Kum me kumiwa apa toyau yempewa me di waya, kuiyawa ye den gae waya, Guwawa Iyakaisiyapama me wape.

¹²Tatawa gwaneba anavi ag omin baraupe, da botope. Mamawa usiwa gumbe anavi ape botope; usitainawa mu mamuwa ge inowa gumbo gara kwaviyape, mu boriruwape. ¹³Kuiyawa me ivunwa oya, iyayapan undag ye diruipe watkukam yempe, go bira da oiyebe konive yusiyusi ag yoigimpewa matai waita wampe.

¹⁴Wanan ye yauya ‘Topai abnawa me di wakukampewa’ me yokeigimpe megara at meumawa onan—Basiemewa igiyawa yaug anoya—iyayapan mu Judia apa wakeyawa mu tui gumbe a ampe. ¹⁵Bira da me gweyawa gwanob gerave wakenewa den kweg aikpe, sira divi da autan oya gwe den unikpe. ¹⁶Bira da nau danave wakenewa wape autan oya den sira taig ompe. ¹⁷Me kumiwa di kukaipe, vesin bug ayawa gumbo, sira inanaiwa ud am munemewa gumbo. ¹⁸Meoya ye nun waya mame taigipam kumiwa danave den pawape. ¹⁹Kuiyawa me danadawai kokavitwa kumiwa. Me God at piyu wadne kumiwa apa onne gare mame, me den pawane sira me matai den pawape. ²⁰Ayapan me kumiwa den kwagomiyape pipi apewa, iyayapan desirom da den vinigimpe. Megara wak tamne igiyawa oya, Ayapan me kumiwa kwagomiyane pipi ane. ²¹Me kumiwa apa, iyayapan da guniyap wapewa, ‘Yauya, Keriso mame!’ go ‘Yauya, me asime!’ megara den anotumat aya. ²²Keriso ugaugaeba sira propeta ugaugaeba mu matai uwape, sira mu guwaguwawa ge irayauyau ape, sira me oma apewa mu wak tamne igiyawa gumbo matai uga yempe. ²³Meoya yembovit amaraya. Ne dividivi undag kum namiven wait ye diruina.

²⁴^bMegara danadawai kumiwa me amave atataivi,
‘Kum matai sisip uwag ompe,
sira dud den esipe; sira kwimin yusiwa ipunapun ape.
²⁵marantun kwimin gumbe aikpe,

^s 13:9 Mat 10:17-20 ^t 13:11 Ruk 12:11-12 ^u 13:12 Mat 10:21 ^v 13:13 Mat 10:22;
Jon 15:21 ^w 13:14 Dan 9:27; 11:31; 12:11 ^x 13:15 Ruk 17:31 ^y 13:17 Ruk 23:29
^z 13:19 Dan 12:1; Rev 7:14 ^a 13:22 Rev 13:13 ^b 13:24-25 Ais 13:10; Joe 2:10,31; 3:15;
Rev 6:12-13

Sira kwimin yusiwa meuma ipunapun ape.’

²⁶‘Me kumive, iyayapan mu Apan Usiwa^d me irikup danave yusiwa ge eyawa koka gaibu uwaigimpe yaupe. ²⁷‘Sira Apan Usiwa me aneya meuma tepe ompe, kwimin piyu gina gampenwa yunadnewa aig gampenwa uwanewa, at ginawa duwam ge duwam gumbe, iyayapan gomiya munnewa matai agoniya.

²⁸Gare yoma inaru gumbe maibe mame yaug anoya. Yoma begawa duwaibe sira kwayawa taibe apewa, tate ye yaug anoya me kum kumiwa me koni aivi. ²⁹Ebu me desiroma, ye me dividivi mame undag yayuyawa, Apan Usiwa me ankwin noive koni aivi yaug anoya. ³⁰Ne natawa diruitna, namu dividivi undag mame veniyape, ivi matai kum garewa uwag aipe. ³¹Kwimin ge piyu mame onanape, megara gae neumawa den onanape.”

Mamunwa God Me Mekut Kum Yaug Anone

³²Oiyat me, nib koniwa da bira den yaug anone. Aneya kwiminauwa ge Usiwa mu mina den yaug anoya. Megara Maman mekut yaug anone. ³³Amat yembovit aya! Yangewa mereruwape yangut aigimiya! Ye den yaug anoyana kum divi me uwape. ³⁴Me gwe mamawa ampa aivinewa mina. Me gwe meuma yankweg nau meumawa amaranawa igiyawa kuiyave kuiyave tepe amarape, desirom desirom nau meumawa anin tenewa ape, sira ankwin noive amaraivi abnawa dipe yangut aigimpe.

³⁵^fMeoya yangut ande aigimiya, kuiyawa ye den yaug anoyana kum divi gwe mamawa taig uwape—anten augoiyau go aram nub bagiwa apa go kokorek waigimpe gumbe go wantete apa go. ³⁶Me ui onan da uwapewa, me den kubvinigimiya yawaibe. ³⁷Ne ye guniyap veniwa ne meib iyayapan undag gumbo veni, ‘Yangewa mereruwape kaipat aigimiya!’”

Vesin Da Iesu Kuiyave Oira Egamne

14 ¹Gare Uwag Gaveya Buyunaeba ge Bredi Iisut Onanwa Buyunaeba oya oiyat duwam wakeya. Pirisi koukawa ge Gwangwan toewanewan igiyawa mu aninin ake Iesu aug totanwa oya gaiyawa dima yuya. ²Mu waya, “Buyunai danave oraimina onan, kuiyawa iyayapan mut yoipetan.”

³^gIesume at Betani apa apan Saimon gweyave wakene. Me yuwat warumne iviwa reprosi aunewa. Me teboru apa wakenewa, vesin da uwane. Arabasta ap^h me danave Narudo oira tayapama me garawa kokawa wakenewa, me aug uwane. Me ap warensine oira tayapama Iesu kuiyave egamne.

^c 13:26 Rev 1:7 ^d 13:26 Me Iesu Keriso. ^e 13:27 Mat 13:41 ^f 13:35 Ruk 12:38

^g 14:3 Ruk 7:37-38 ^h 14:3 Ap an uiwa muinne gumbe wariyawa

⁴Iyayapan upeba asimeve wakeyawa mut igamne gae garawa aya, “Me divi oya oira tayapama beregam aivi? ⁵Me gwiruwatponowa me garawa 300 denari sira egave aupono. Sira anmaga me gwandokuwaeba igiyawa mumpono.” Mu gae gera gerave me gumbewa ge wa aya.

⁶Megara Iesu wane, “Yankweya me anoiviwa ape. Divi oya ye me pui yuene? Me ne gunap oraimina di ane. ⁷Gwandokuwaeba igiyawa mu kum evedni ye gaibu wakeya. Sira ye oma ape mu waita muniya kum da ye imuyep apewa. Megara ne guniyap evedni den wakeeni. ⁸Vesin mame oma ane anewa ane. Me oira tayapama kwapunwa egamnewa me bo neuma oya namiven tamibarip ane. ⁹Ne natawa diruieni. Piyu mame danave at ampa ampa undag gae oraiwa mame opata wapewa, vesin mame anewa gaibu dirumpe me imug anope.”

¹⁰Meve Judas Isukariot, aigowawa 12 danowo desirom da, me Iesu ominawa tetan oya pirisi kouwawa munan aine. ¹¹Mu mame anoyawa degadega aya. Mu anmaga wantan oya agi waya. Meoya Judas me Iesu nanuwo barautan oya ebu da oraiwa diune.

Ayapan Augoi Nakwaeba

¹²^kIist Onanwa Bredi Buyunaeba kum namuirenwa, me Uwag Gaveya sip usiwa toin guttan kumiwa, Iesu aigowawa me gumbewa singui waya, “Ampa ge imugap Uwag Gaveya Buyunaeba nakwai meuma ge natan oya nu ampa anke tamibarip ata?”

¹³Meoya me aigowawa duwam tene amiya, sira dirum wane, “Gwetoimu kokawa danave aisiya. Me apa apan da me yoi irutawa aug aivine me ye yauyempe, me amave aisiya. ¹⁴Gwe danave unig amiyawa, gwe abnawa gumbewa waya, ‘Toewanewan didnunne. Ne amdau pantut neuma ampa? Me danave ne Uwag Gaveya Buyunaeba aigo neuma gaibu nata.’ ¹⁵Pantut kokawa painauwa me toyau yempe yauya teboru ge seya dividivi wait tamibarip ane. Me apa nunan tamibarip aya.”

¹⁶Me aigowawa dauwag amiya. At kokawa danave unigiyawa mu yauya dividivi wait Iesu mu gumbo wanewa mina. Meve mu Uwag Gaveya Buyunaeba oya tamibarip aya.

¹⁷At augoi uwag onnewa, Iesu aigowawa 12 gaibu asime uwaya. ¹⁸^lMu teboru apa wakek nakwai nemewa, Iesu wane, “Ne natawa diruitna. Ye da ne omin neuma barautan aivi—ud me gare ne gaibu nakwai netewa da.”

¹⁹Mu danadawai auya desirom desirom me gumbewa waya, “Natawa di me ne onan?”

²⁰Iesu garawa mu gumbo wane, “Me aigo neuma 12 danowo desirom da. Me ne gaibu bredi kabum danave puwamnewa. ²¹Baiboru gumbewa

ⁱ 14:7 Deu 15:11 ^j 14:8 Jon 19:40 ^k 14:12 Eks 12:6 ^l 14:18 Sam 41:9

nenan tenewa mina Apan Usiwa me matai kweg aipe. Apan Usiwa gumbe omin meuma tepewa me gumbe ano kukaeba wakeigimpe! Me den yaipawa me menan oya oraimina.”

²² Mu nakwai nemewa Iesu bredi aune, engaun wanne sira wapeyam aigo meuma munne. Me wane, “Auya, mame ne kwapunwa.”

²³ Meve me ap aune, engaun wanne, sira aigo meuma munne me gumbe mu undag naya.

²⁴ Iesu mu gumbo wane, “Mame ne ganigani neuma agi wanawa, ganigani areriyag aikpe iyayapan obiren munan. ²⁵ Ne ye natawa diruitna. Ne yoma greip magawa yoiba sira den natna. Ne waketna God toimuwawa danave meve mataiwa natna.”

²⁶ Mu waiyawaiya bererinawa toya onananewa, mu dauwag tui Orivu oya amiya.

Iesu Yaug Anone Pita Uyai Wape

²⁷ Iesu mu gumbo wane, “Ye undag matai uyug aigiya. Kuiyawa me wait tenewa di: ‘Mae sip amaraivi abnawa ne totnawa sip mu marewampe.’

²⁸ Megara ne sira wan yoitnawa, ivi ne matai namuiban at Gariri anekna.”

²⁹ Pita taibe wane, “Anten undag matai uyug aikpe mina, go ne onan.”

³⁰ Iesu garawa wane, “Ne natawa diruktna. Kum garewa,—aram garewa—, namu ge koniwa duwamdesi wa me ne den yaug anonega, ivi kokorek koniwa duwameba wape.”

³¹ Megara Pita noiwa yusipamit wane, “Anten ne ge gaibu bo ata go, megara ne den di watna, ‘Ne den yaug anogemna.’” Sira aigowawa upeba undag gae desiroma waya.

Gessemani

³² Mu at iviwa Gessemani oya amiya. Aigo meuma gumbo Iesu wane, “Ne nun waigimpnawa ye mapa wakeya.” ³³ Me Pita, Jemus ge Jon tam gaibu amiya. Me amatog danadawai kokavit aune. ³⁴ Me gumbo wane, “Danadawai kokavit auna guwanwa bo yumatawa apa avivi. Mame apa wakeg yangewa mereruwape.”

³⁵ Kusi utan aig petat piyu egave aigne nun wane, “Me oma ape ipewa kum mame ne gunap uwag gaveyag aipe.” ³⁶ Me sira wane, “Abba^t Maman, ge gungap dividivi undag oma ane. Ne gunap ap mame atan auwa. Megara ne anoeniwa onan, anoegewa a.”

^m 14:24 Eks 24:8; Jer 31:31-34; Jak 9:11; 1Ko 10:16; Ibr 9:20 ⁿ 14:27 Jak 13:7

^o 14:28 Mat 28:16; Mak 16:7 ^p 14:31 Jon 11:16 ^q 14:32 Jon 18:1 ^r 14:34 Jon 12:27

^s 14:36 Mak 10:38; Jon 6:38 ^t 14:36 Natawa me Maman.

³⁷Meve aigo meumawa Iesu sira taig onne. Me yawamnawa mu kubvineme. Me Pita gumbene wane, “Saimon, ge kubvinege? Ge kum desirom mina oma den ane yangut aigima? ³⁸Yangagwa mereruwape kaipat aigima sira nun waigima. Amaerot danave den uyug aiga. Guwagwa imive aivi, go kwapugwa yusiwa onan.”

³⁹Iesu me sira taig aig gae desiroma gumbene nun wane.

⁴⁰Me sira taig onnawa, me yawanne mu sira ande kubvineme. Kuiyawa yangowa ibnawaya. Mu den yaug anoya anin Iesu gumbo wape.

⁴¹Koni duwamdesiyawa Iesu sira taig uwane mu gumbo wane, “Ye kub ande vinene, nonewa emene? Minambe! Kum uwane. Yauya, Apan Usiwa kukaeba igiyawa nanuwo omin meuma baraupe. ⁴²Wan yoiya! Anta! Mame ne omin neuma tenewa abnawa uwane!”

Iesu Yumiya

⁴³Iesu me gae waivinewa, Judas me aigowawa 12 danowo desirom da uwane. Me gaibu iyayapan obiren deba ge gadiga tam uwaya. PIRISI KOUKAWA, Gwangwan toewanewan igiyawa sira namuyoiyai igiyawa mu teya onamiya.

⁴⁴Gare omin baranewa abnawa mu gaibu ebu wariya. “Apan me ne uwa totnawa me me. Me yum yusiwa veyag aug aisiya.” ⁴⁵Judas tatevit Iesu gumbene uwag wane, “Rabai!”^u sira me uwatone. ⁴⁶Iyayapan Iesu yum auya. ⁴⁷Me apa Iesu gumbene yokeemewa danowo desirom da me deba meuma arobne pIRISI painauvitwa nau meuma wariviwa da viyag naunawa kwagomiyane aigne.

⁴⁸Iesu wane, “Ne ub igiyawa tam namuyoiyai eni go? Meoya ye deba ge seri gumbene ne yumnektan uwayana? ⁴⁹“Kum evedni ne ye gaibu, sira temporu arawa danave ye toyau emeni, megara ye den ne yum negiyana. Megara Baiboru gaiyawa me di veniyape.” ⁵⁰“Meve iyayapan undag Iesu yankweyeg a amiya.

⁵¹Apan mataiwa me taibe, wape rinen egavewa mekut enne. Me Iesu amave aivinewa mu me yumtan eme. ⁵²Me wape meuma yankweg taibe kintog a aine.

Daiboru Painauvitwa Namive

⁵³Mu Iesu pIRISI painauvitwa gumbene aug amiya. PIRISI KOUKAWA ge namuyoiyai igiyawa ge Gwangwan toewanewan igiyawa undag uwag agoniyaya. ⁵⁴Pita kusi isinutiren me amave aig pIRISI painauvitwa gwe arawa unigne. Me apa gwe amaremewa gaibu yan wakeg iyam veraivi.

⁵⁵PIRISI KOUKAWA ge Daiboru Painauvitwa igiyawa undag Iesu tope boatan oya gae umum natawa didimama eme. Megara mu natawa da den

^u 14:45 Natawa me toewanewan. ^v 14:49 Ruk 19:47; 21:37; Jon 18:20

^w 14:50 Sam 31:11

yauya. ⁵⁶Iyayapan obiren me gumbe ugauga waya, megara umum muma wayawa me den yunadne.

⁵⁷Meve iyayapan upeba wan yoike ugauga umumawa mame me gumbe waya: ⁵⁸ ^x“Nu anotu me wane, ‘Ne temporu mame me iyayapan siyawa wakukampna, sira kum duwamdesi danave dawa me iyayapan nanuwo den sipewa ne sitna.’ ” ⁵⁹Megara me apa umum mumawa den yunadne.

⁶⁰Meve pirisi painauvitwa iyayapan yapowo wan yoine Iesu gumbe singui wane, “Ge garawa wa go onan? Iyayapan mame umum kukaeba gungap vemewa ge anin anoege?” ⁶¹Megara Iesu ande iyaigidne garawa den wane. Pirisi painauvitwa me gumbe singui sira wane, “Ge Keriso, Waribiyane Usiwa?”

⁶²Iesu garawa wane, “Ne me. Ye matai yauya Apan Usiwa me Yusipama naniyutanwa apa wakegimpe, sira guwaveru kwiminawu egawe wakeg uwaigimpe yauya.”

⁶³Pirisi painauvitwa wape meumawa warimine. Me wane, “Divi oya nu yauyawa da tamta? ⁶⁴Ye God gumbe iyagau mina anoene. Ye anin anoene?” Mu undag me gumbe anog waya me boatanit di. ⁶⁵Meve iyayapan upeba amatog gwitup me gumbe emiya. Mu me yangawa tuboriya nanuwa gumbe toya, sira waya, “Ge wa, bira toagivi!” Sira gwe amaremewa me aug toya.

Pita Iesu Gumbe Uyai Wane

⁶⁶Pita me gwe visive painau wakenewa vesin otawu me pirisi painauvitwa nauwawa aiviwa da megiyave uwane. ⁶⁷Me yaune Pita iyam iravi, sira me gumbenut yangut yaune, wane, “Ge mina Nasaret apan Iesu gaibu gigene.”

⁶⁸Megara me uyai wag wane, “Ne den yang anona ge divi oya vege.” Me ankwin noiwa gumbe aine.

⁶⁹Meve vesin otawu nauwawa aiviwa me Pita yaune, iyayapan birorot yokeyawa gumbo me sira amatog wane, “Apan mame mu dawa.” ⁷⁰Me sira uyai wane. Pungi den wane, iyayapan birorot yokeyawa sira Pita gumbe waya, “Natawa di, ge mu desiroma da, kuiyawa ge Gariri apan.”

⁷¹Me amatog aewag wane. Me gae natawa di mu gumbo wane, “Apan mame ye menan venewa ne den yang anona.”

⁷²Tatevit kumkum duwameba wane. Meve Pita me watavit Iesu gae wanewa imug anone, “Namu koni duwamdesi ge ne topai negawa, ivi kumkum koni duwam wape.” Sira me petat tog iruwane.

^x 14:58 Jon 2:19-21 ^y 14:64 Rvt 24:16; Jon 19:7

Iesu Pairat Namive Yoine

15 ¹ ^zMumbevit pirisi koukawa, namu yoiyoi igiyawa, Gwangwan toewanewan igiyawa, ge Daiboru Painauvitwa igiyawa undag gaibu dima yuya. Mu Iesu tug dauwag amiya. Pairat nanive me barauya.

²Pairat Iesu gumbe singui wane, “Ge Ju igiyawa kin mumawa?” Iesu garawa wane, “E, meme vege.”

³Pirisi koukawa Iesu gumbe dividivi undag pui yusipamit yuya. ⁴Sira Pairat me singui wane, “Ge gae garawa da den wa? Yawa, mu ge gungap dividivi undag pui yuwageme.”

⁵“Ande Iesu gae garawa da den wanewa, Pairat terane.

⁶Gare, buyunai kokawa kumive, kansoru kokawa anoanowawa wakene. Nog aegiya iyayapan wag desirom ingui arob baraupe dauwag aipe. ⁷Apan da iviwa Barabas nog dana wakene. Iyayapan mut igamivi mut ag guriya boriruwaya. Me mu gaibu nog danave wakeya. ⁸Aninin bairawan evedni Pairat munan aivi mina atan oya, iyayapan obiren Pairat gumbe uwag amatog dig waya.

⁹Pairat garawa wane, “Ye anoene ne Ju igiyawa kin muma yenan kwetna dauwag aipe?” ¹⁰Kuiyawa me yaug anone pirisi koukawa mu gunarepam eme oya Iesu aug waniya. ¹¹^bMegara pirisi koukawa mu iyayapan obiren Pairat dipe mu imuwo Barabas kwepe dauwag aipe.

¹²Meoya, Pairat sira dirum wane, “Ne apan mu vemewa Keriso oya aninin aten?”

¹³Mu kwaruwaya, “Korosi gumbe toya!”

¹⁴Megara Pairat wane, “Divi oya? Kukaeba meuma divi ane?” Megara mu nouwa au ge kwaruwag waya, “Korosi gumbe toya!”

¹⁵Pairat imive iyayapan obiren degadega ape. Sira me Barabas me arobne dauwag aine. Me Iesu murap yaigipama gumbe toya, sira korosi gumbe totan oya mu nanuwo baraune.

Mut Igiyawa Iesu Gumbe Iyagau Okeriwa

¹⁶Mut igiyawa Iesu auwag kokawa gweyawa danave unig amiya. Gwe me Romu kokawa muma baraune onne amarag viniviwa. Sira mut igiyawa undag agonyatan auwaya. ¹⁷Mu me gumbe wape yobutaren en waniya,—wape gamateba me pundirit ge diyapam yapavewa,—meve mu murap ipuni ganaganapam aug ikoki ag kuiyave tonasiya. ¹⁸Meve mu amatog menan auwaya, “Kaiwa kaiwa! Ju igiyawa kin mumawa!” ¹⁹Sira mu tutu gumbe me kuiyave toya, gwitup me gumbe emiya, koniwo yug me gumbe petat aya. ²⁰Mu Iesu gumbe iyagau wag, wape asime atan aropeg wape meuma yobutatae aug enwaniya, wape gamateba me

^z 15:1 Ruk 22:66 ^a 15:5 Ais 53:7; Mak 14:61 ^b 15:11 Apa 3:13-14

pundirit ge diyapam yapavewa. Meve me auwag taibe dauwaya yoma korosi gumbe tope boitan oya.

Iesu Korosi Gumbe Toya

²¹ Saimon me at Sairin apan, Rupas ge Arekisanda mamowa. At meuma apa uwag onnewa. Me korosi oieve autan oya ayag waya aune. ²² Mu Iesu auwag at iviwa Gorugosa uwaya. Me natawa at me Kuyamarednawa. ²³ Meve mu wain me gegura iviwa maaru gaibu biroriyayawa waniya, go me den nane. ²⁴ Meve mu korosi egave toya. Mu wape meuma kepteya, biravit divi autan oya kae kusi aya.

²⁵ Mu korosi egave me toyawa me mumbe kum koniwa 9 apa. ²⁶ Gigirum me kukaeba meuma teg yayuyawa me aib tene: JU IGIYAWA KIN MUMAWA. ²⁷ Mu ub igiyawa duwam korosi egave mu gaibu towamiya, da naniyutanwa, da naniketaiwa apa. ²⁸ (-) ²⁹ Iyayapan bira bira uwag amomewa gae kukaeba Iesu gumbe veme, kuiyowa viyaviya eme, mu veme, “Ge wana, ‘A! Temporu toyayag sira kum duwamdesi danave sitna.’ Gembovit wag inaigita. ³⁰ Korosi gumbe aig onaga gembo waita a!”

³¹ Ebu desirom gumbe pirihi koukawa ge Gwangwan toewanewan igiyawa mu gaibu Iesu gumbe yano waya. Mu waya, “Me iyapan upeba waita munne, go me oma den ane membo ingan waita wampe! ³² Keriso, Isuraeru kin mumawa, gare mame di korosi gumbe aig onaga. Nu yautave ge gungap anotumat ata.” Iyapan Iesu gaibu korosi egave towamiyawa mu mina gae kukaeba Iesu gumbe dig waya.

Iesu Boane

³³ Kum kuiyunup aune, at undag sisip uwag aine, augoi kum koniwa duwamdesi aune. ³⁴ Kum duwamdesi aunewa Iesu noiwa kokavit wane, “Eroi Eroi rama sabakutani?”—Me natawa, “Maman maman, divi oya ne yankwenegana?”

³⁵ Iyayapan upeba megiyave yokeemewa anog waya, “Anoya! Me Eraija oya auwaiwi.”

³⁶ Apan desirom kin tog, sponji^h danave wain sisipam em arob aug tutu ginave yune Iesu natan oya wanne, me wane, “Me yankweya wakepe. Nu yauta Eraija uwag me aug aikpe, go.”

³⁷ Iesu awau kokavit wanewa gaup meuma oieba tareyane.

³⁸ Temporu danave wape kokawa me geroriyayawa me kuiyawa apa dumed aig onke ginawa uwane duwam ane. ³⁹ Senturionⁱ me Iesu namive

^c 15:21 Rom 16:13 ^d 15:24 Sam 22:18 ^e 15:29 Sam 22:7; 109:25; Mak 14:58

^f 15:34 Sam 22:1 ^g 15:36 Sam 69:21 ^h 15:36 Me wape tautau mina. ⁱ 15:39 Me mut igiyawa 100 amaraivi abnawa.

joinewa me awau wanewa anone, me aninin botone yaug wane, “Natawa di apan mame God Usiwa!”

⁴⁰JVesin upeba painau apa yan greme. Mu danowo Magdara vesin Meri, Jemus kusikaren ge Josep inawa Meri ge Sarome wakeya. ⁴¹At Gariri apa vesin mu Iesu amave onamiya sira amat meuma aya. Vesin obiren upeba me gaibu at Jerusarem uwayawa mu asimeve wakeya.

Iesu Dagup Danave Barauya

⁴²Augoi uwag onne. Kum me Tamibarip Kumiwa, sira me namiven umae Sabat Kumiwa. ⁴³At Arimataya apan Josep, me Daiboru Painauvitwa igiyawa yapowo kokawa. Me membo God toimuwawa uwatanwa oya amaraivi. Me ano meuma yusipamit ane Pairat gumble uwag Iesu kwapiwa oya nun wane. ⁴⁴Pairat Iesu wait boanewa anog terane. Me senturion menan auwag singui wane Iesu wait boane go onan. ⁴⁵Me senturion gumble natawa di wat kiniyanewa, Iesu kwapiwa Josep wanne. ⁴⁶Josep wape rinen gwiruwadne. Kwapiwa aug aignewa wape me gumble panne. Sira dagup danave baraune. Dagup me an koka kwabnewa. Meve me an koka wak siririyane dagup ankwinawa tobodne. ⁴⁷Magdara vesin Meri ge Jose inawa Meri mu Iesu barauyawa arawa yangowo yauya.

Iesu Sira Inaig Yoine

16 ¹Sabat Kumiwa onananewa, Magdara vesin Meri ge Jemus inawa Meri ge Sarome, mu Iesu kwapiwa oira barautan oya aroma^k gwiruwariya. ²Pura danave kum namuirenwa mumbevit, kum di dauwaivi, dagup oya onamiya, ³sira vesin mu gae singui garawa aya, “Bira da dagup ankwinawa apa an^l itariyape watappe?”

⁴Megara mu yangut wan yauyawa, mu an koka me wait itariyane. ⁵Mu dagup danave unigiyawa, mu apan mataiwa me wape yobutatae puipuyuwu enne yutanwa apa yan wakeivi yauya. Vesin a aya.

⁶Megara me wane, “A den aya. Ye Nasaret apan Iesu me korosi egave toyawa oya yobene? Me sira inaig yoine! Me mapa den wakene. Yauya me barauyawa arawa. ⁷^mYe aisiya, aigo meuma ge Pita dirumiya, ‘Me namuiban Gariri aivi, me anin diruineuwa mina, me apa ye me yauya.’”

⁸Vesin mu daramdaram sira pimpangit ag, dagup apa dauwag kintog amiya. Mu da bira divi da den diya, kuiyawa a aya.

[Baiboru Namu Tenewa Obiren Danave Mak 16:9-20 Den Wakene.]

⁹Pura amatonewa apa mumbevit Iesu sira inaig joinewa, me Magdara vesin Meri gumble namu uwane. Numan Iesu airapu kukaeba 7 vesin

^j 15:40 Ruk 8:2-3 ^k 16:1 Me gegura tayawa oraiminawa. ^l 16:3 Me an kokawa me dagup ankwin tobodne ^m 16:7 Mat 26:32; Mak 14:28

me gumbe atatai imne. ¹⁰Iyayapan mu Iesu gaibu gigemewa danadawai auwag iruveme. Meri mu gumbo aig dirumne. ¹¹Mu anoya Iesu me inaine vesin me yaune, megara mu anotumat den aya.

¹²Ivi apam duwam mu at da oya amomewa, Iesu tobiyane gina ube mu gumbo uwane. ¹³Mu duwam mame sira taigiya upeba gumbo umum waya, megara mu mina anotumat den aya.

¹⁴Ivi aigowawa 11 nakwai nemewa Iesu mu gumbo uwamunne. Me anotumat muma yan aigne sira nokakae aya oya me mu gumbo yamdapam wane. Kuyawa Iesu sira inaig yoinewa iyayapan yayawa mu iyayapan upeba gumbo umum wayawa mu anotumat den aya.

¹⁵°Me mu dirumne, “Piyu undag gumbe dauwag aisiya. Sira gae oraiwa undag wat temunnewa gumbo dirumiya. ¹⁶ªBira da anotumat ag babataito apewa me waita aupe. Megara bira da me anotumat den apewa me ibnawa aupe. ¹⁷ªSira irairawa mame anotumat aya igiyawa gumbo. Ne ivunwa gumbe airapu kukaeba atatai impe; mu pednowa mataiwa gumbe gae wape; ¹⁸ªmu mokare nanuwo gumbe wan aupe; mu yoi kukaeba nape, go mu gumbo da den di kukaibe; mu nanuwa yuwat igiyawa egowo tepe oraimina ape.” ¹⁹ªAyapan Iesu mu gumbo gae wane, meve me kwimin danave dog aine sira God naniyutanwa apa wakene.

²⁰ªMeve aigowawa dauwag amiya sira ampa ampa gae wag dirumiya. Ayapan mu gaibu nau ag gae meuma wat kiniyatan oya irairawa toyau munne.

ⁿ 16:14 1Ko 15:5 ° 16:15 Apa 1:8 ª 16:16 Apa 2:38 º 16:17 Apa 2:4; 8:7

ª 16:18 Ruk 10:19; Apa 28:3-6 º 16:19 Apa 1:9-11; 2:33-34 º 16:20 Apa 14:3; Ibr 2:3-4